

ርኢሰ ኢሳይያስ ወጀነራል አልቡርሃን፡ ዲብ አስመረ ለአመራር

ርኢሰ ኢሳይያስ አፈወርቂ መስከሉል ምጅልስ ሰያይት ሱዳን ጀነራል ዐብዱልፈታሕ አልቡርሃን፡ የም 10 ኦፕሬል ሐቆ አድህር ዲብ አስመረ ቃዕት ሀገር ህደግ ወደው።

ለግርሐት፡ ዲብ ተጠውሮ ዕላቃት ኤርትራ የውዳን፡ ሐርብ ሱዳን ወተጠውራቱ፡ ክምሰልሁመ ክልኢተን ድወል ለከሰስ ቅደይ መንጠቀት

ወእዲነ ህደግ ርኢሰ ወደው።

ርኢሰ ኢሳይያስ፡ ሕክመት ወሽዐብ ኤረትሮፕ እግል ሐ ሽዐብ ሱዳን ለወደው ትሉሊት ሰዳይት፡ ናይ መብደእ ወደሚር ክምተ እንዴ አከደ፡ ሐርብ ሱዳን ምን መትኢታይ ካርጅ ሕር እንዴ ገብእ ሰላም እግል ልርከብ፡ ሽዐብ ናይ እለ መንጠቀት መጦር ሽዐብ ሱዳን እንዴ ገእ ዶሩ እግል

ሊዴ ተሐሰቡ።

መስከሉል ምጅልስ ሰያይት ሱዳን ጀነራል ዐብዱልፈታሕ አልቡርሃን ምስል ኤሪነ እትለ ወደዩ መቃብለት-ሐጫር፡ ዲብ አስመረ ለወደዩ ናይ ሐቱምዕል ዝያረት ሽቅል፡ ተጠውራት ሐርብ ሱዳን እግል ሕክመት ኤርትሮፕ ተውዴኡ እግል ሂባት፡ ክምሰልሁመ እግል ሕክመት ወሽዐብ ኤረትሮፕ



ሱረት፡ ሳሌሕ ዓብደልቃድር

እት እግል ሽዐብ ሱዳን ለአውፈው ሕዳድ ለአለብ ሰዳይት ትሉሊት እግል ለሐምድ ለአመመት ክምተ ሽርሐ።

መስከሉል ምጅልስ ሰያይት ሱዳን ጀነራል ዐብዱልፈታሕ አልቡርሃን፡ የም 10 ሰዕት 2፡00 ሐቆ አገህር አስመረ ዲብለ ነት ዲብ፡ ርኢሰ ኢሳይያስ አፈወርቂ እብ ናይ

ሕሽመት አሲራር ትከብቱ። ሳዕት 4፡00 አልዐር ህይ፡ ዝያረቱ እንዴ አትመመ፡ እብ ሕሽመት ትሳርሐ።

ዲብለ ዐደት ከብቱ ወሰርሐ፡ ወዘር ካረጃየት አሰይድ ዐሰማን ሳልሐ፡ ክምሰልሁመ መትምማይ ቅድያት ሰፋሪት ሱዳን ዲብ ኤርትሮፕ ቻዘ ባብክር ሐድራም ዐለው።

መድረሰት ሴድየት ኔርስ ግላስ 122 ሐኪም አድሐረት

ዲብ ሐጋት ለህሌት መድረሰት ሴድየት ኔርስ ግላስ እግል መደት ሰነት ወሰር እብ ፍዕል ወዝዘር ለአድረሰቶም 122 ደረሳይ፡ ዲብ የም 12 ኦፕሬል እብ ሻሃደት አድሐረት።

ሙዲር ናይል መድረሰት መምህር ገብረብርሃን ሀብተገርጊሽ ዲብ ቀደመዩ ተቅሪር፡ አንፋር 34ይት ደውረት ክድመት ወጠን ላቶም መትድሕረት፡ ዲብ እስብዳልያት ወመአሰሳት ዓፍየት ባረንቱ፡ ደቀምሐሬ፡ ከረን፡ መንደፈረ ወተሰነይ እብ ፍዕል ለተሀየቡም ተእሂል እብ ባቃዕት ክምሰል አትመመው ሐቆለ

ሐበረ፡ ዲብ ትዩመመው እት አነን እብ ምህቶም እግል ልክደም ትፋን።

መስከሉል እስብዳልያት መርከዘዩት ግላስ ለቱናል ኮሎኔል አርአየ ተክለሃይማኖት እብ ጀህቱ፡ ምህቶ ዓፍየት ደሚር ወእክላቅያት ሰብር ወፈህም ዛይድ ክምሰል ጠልብት እንዴ አሸረ፡ መትድሕረት እግል ሽዐቦም ወወጠኖም እብ መትሰባል እግል ልክደም ትላኩ።

ወኪለት መትድሕረት እብ ጀህቱ፡ እብ ደሐረው እብ መጃል ወጠኖም ወሽዐቦም እግል ልክደም ዱሉያም ክምቶም አከደት።



ዲብ መናሰቡት መትድሕረት ቃእድ ቅደደት ጃሽ ሽዐብ ብሪጋደር ጀነራል ተክሌ ልብሱ፡ ቃእድ አርካን ቅደደት ጃሽ ሽዐብ ብሪጋደር ጀነራል ሚካኤል ሃንሰ ክምሰልሁመ ሙዲር



ተንፊዚ ውቁል መአሰሰት ተዕሊም ወበሐስ ዶ/ር ሀይሌ ምሕጹን ሹሩካም ዐለው።

ዲብ ወሬሕ ፌብርዋሪ 2013 ክድመት እግል ተሀብ ለአስተብዳት

መድረሰት ሴድየት ኔርስ ግላስ፡ የም ዓመት እግል 5ይት ዶላ ተአድሕር ለህሌት እት ገብእ፡ አሰክ እለ 188 አንሳት ለብእቶም 436 ደረሰ ክምሰል አድሐረት ወሳይቀ ለሐብር።

ምግብ፡ ደረሰ ፈዳብያም ጃእዘት 'ፊተውራሪ' ልትሀየቦ

እት አቅሊም ምግብ እብ መዓወነት መሕበር ወጠን ሽባብ ወደረሰ ኤረትሮፕ፡ እዳሪት አቅሊም ወፈሬዕ ውሳሪት ተዕሊም፡ ዲብ ወጠንያይ እምተሐን 8ይ-ፊልል ሰነት ድራሰት 2023/2024 ገቀጥ ውቁል ለአምጽአው 241 ደረሳይ ጃእዘት 'ፊተውራሪ' ተሀየቡ።

የም 12 ኦፕሬል ዲብ ቃዕት ኤክሰፕ ዲብለ ገብኢት ዓደት፡ ለ 61 ምእይት አንሳት ለልትረከብ እቶም ፈዳብያም ደረሱ ምን 90 ወለዐል ንቃጥ ልአምጽአው ክም ቶም ተሐሰረ።

ምንለ ጃእዘት ለረክበው፡ ሰለሰ ወለት ለልትረከብ እቶም ሐምስ ደረሳይ 100 ምን 100 ሰባት አምጽአው፡ ካስ



ወታብሌት ትሰርገው።

መስከሉል ፈሬዕ ተዕሊም ናይል አቅሊም አሰይድ በላይ ሃብተጋብር፡ ደረሳይ ንቃጥ-ሰኔ እግል ለአምጽአ ለሰድዩ፡ እት ረክሰሰ መደርሱ ለሀህይብቱ ዕልም፡ ጅህድ ናሱ መታብዕት ወሰዳይት ዋልዴት ወመራቡቱ ክምቱ እንዴ አሸረ፡ ዶር ዋልዴን እግል ልትወቀል አትፋቀደ።

መስከሉል ፈሬዕ መሕበር ወጠን ሽባብ ወደረሰ ኤረትሮፕ አሰይድ ሳምላም ክፍሌ እብ ጀህቱ፡ ተዕሊም አሳስ ተጠውሮ ሰባት ቱ ሕሰር ወበቃዕት ደረሰ እግል ልትወቀል፡ ምስል ውሳሪት ተዕሊም እብ መትዐዋን

ጅህድ ትሩድ ገብእ ክም ህለ ሐበረ።

በዕል-መዝበር መሕበር ወጠን ሽባብ ወደረሰ ኤረትሮፕ አሰይድ ሳሌሕ አሕመዲን እትለ አሰመዐየ ከሊመት፡ ለአምዕል እምበል ዲብ ደረሰ ወአድረሰት ልትረኡ ለህለ መትቀዳም፡ ፍንጌ መዲነት ወብደር ለጸንሐ ፈርግ እት ጨብብ መጽእ ክም ህለ እግል ትፍህሙ ክም ልትቀደር እንዴ አሸረ፡ እግል ዕውታም ደረሱ ዋልዴን ወመደርሲን "አሰናይኩም" ቤሌ።

ጀዋእዝ ለከሰአው እግል ኤሪነ እትለ ቀደመው ሐብረ፡ ራክባሙ እብለ ህለው ዐውቱ እንዴ ትፋየተው፡ ለተሌ ሄራር ድሩሰ እብ ዐውቱ እግል ልአትመሙ ገለድ በይአው።

ግብለት፡ ቅስም ዓዳት ወርያደት እግል አንፋሩ ተእሂል ለሀይብ

ቅስም ዓዳት ወርያደት አቅሊም ግብለት ዲብ ምዴርያት እግል ሸቄ 38 ነፈሩ እዳረት ማልየት ወደግብይ ጽብጠት ዐፍሽ ለክሰሰ ተእሂል ምን ዮም 8 አስክ 10 አፕሪል ዲብ መንደራረ ነዘመ።

ለተእሂል፡ አግደ ዲብ ጀሚሮ እተይ ማል ርያደት እግል ልግባእ ዲበለ ብእቱ መምርሕ ለረከዘ ዲብ ገብእ፡ ምስል መምራሕ ወቀዋኒን ማልየት ለገይሰ ጋራት ለከምክም ቱ።

ወራታት ርያደት እብ መሻረከት ወተምዊል ሙጅተማሶ ለገብእ ሰበት ቱ፡ ምን ሽዑብ ወመአሰሳት ለልትኬለል እተይ

እብ ዋጅብ እግል ልትጀማሶ ወዲበ ወጅቡ መግል እግል ልውዐል ክም ለአትሐዜ ትሸርሐ።

መስኡል ፈሬዕ መፈወድየት ዓዳት ወርያደት አቅሊም ግብለት አሰይድ ሃይለማርያም ገብረመድህን፡ መጥ-መጦርለ ተእሂል ዲብ ክሉ መጃላት ርያደት ዐቦት እግል ትምጽእ ገብእ ለሀለ ጅህድ፡ ዲብ አግቡይ ጽብጠት ወእዳረት ማልየት ወዲብ ሕፍዘት ዐፍሽ ርያደት አግቡይ ራትዕ እግል ለሀሌ ለሰዴ ክምቱ ሐበረ።

እት አካቲመ ናይለ ተእሂል ሙዲር ዓም ቅስም ዓዳት ወርያደት



አሰይድ አብርሃም ዮሃንስ፡ እተ አቅሊም እግል ተምዊል ርያደት እንዴ ትበሀለ ለልትጀማሶ ማል



እበ ትደረሰት ገበይ እግል ልግባእ ልትክደም ክም ሀለ እንዴ ሐበረ፡ ለደርሰው ካሰባሙ ለሀለው አምር

ዝያድ መስኡልየት ለለአረፍዕ ክምቱ እንዴ ፈሀመው ዲብ ፍዕል እግል ልሸቀው እቡ አትፋቀድ።

ተቅሪር

ጀማሂር ሳሕል እት መሳክብ በዲሮም



2^ይ ወናይ ደንጎበ ክፈል

ሐቆ ዕርፍ ዲብ መዲነት አፍዐበት ሳዐት 1፡30 ምን አፍዐበት አስክ ቅብለት አተጀሂ። ለዲብ ማርስ 1988 ዲብ መደት መደውሻሽ ናደው እዝ ዲብ ረአስ ጄሽ አባይ ዐቢ ደማር ለጀረ እተ ሐርመት ዐሾርም እንዴ በጽሐነ እግል ዲበ መሓዝ ደማን ወደገለብ ሸቱት ለዐለ ኖሱ ታሪክ ለለሓኬ ገደድል ናይለ እተ ወክድ ለሀይ እብ ፍራስ ጄሽ ሸዕቢ ለደመረ መምተለካት አባይ እት ነዐፌ ህዩ

ክብክብ እንዴ ሐለፍነ ሕሊል ሕዳይ በይአነ። ምድር ክምስል ዐወድወደ ህዩ እብ ሐርመት ስጋድ እንዴ አተንከብነ መዲነት ነቅፈ አቱነ።

ሐቆ ድራር ለበርናምጅ ረሰሚ ዲበ መንተዘህ ሸባብ መዲነት ነቅፈ ለህሌት ቃዐት ሸባብ አሰልፍ ሙዲር ምዴርየት ነቅፈ አሰናይኩም ወአሰናይ ደሐን መጽአኩም ሐቆለ ቤለ ግራሁ መስኡል መሕበር ጀማሂር ሳሕል አሰይድ ሀብቱ ገብረማርያም ወናይብት ርእሰት

ቦርድ ጀማሂር ሳሕል አሰይደ ልያ ገብረአብ እብ ክሰሰል መናሰበት ወዱሉይ ለሀለ በራምጅ ለክሰሰ ጽብጥ እብ ጀህት ጀህቶም ሸሬሕ ሐቆ ሀበው፡ ምስለ ዐለ ተዐብ አዳም ዲብለ እት መድረሰት ካድር ዱሉይ ለዐለ መሳክብ ወሰርመ ዲብ ሆቱላት ነቅፈ ምምያይነ ጸበዋነ።

ፈጅራተ ዮም 5 አፕሪል 2025 ሳዐት 6፡30 አስቡሕ ዲብ ጂራ-ፍዮሪ እንዴ ትጀመፀነ። እበ ጸዐደ ባሰነ አስክለ ዐማር ወእብ ፍንቱይ ከዛን ሐዲስ ልሸቄ እቱ ለሀለ ሕሊል ጠብረ አተጀሂ። ጠብረ ምን መዲነት ነቅፈ እንክር ቅብለት ምውዳቅ ጸሓይ ለሀለ ታሪካይት አካን ተ።

ምን ጂራ-ፍዮሪ እት ትበገሰነ እቱ ወክድ፡ ለዲመ ገማል መሕበር ወሰርገል ወቀይ ላተን ሕረም ከበሮህን እንዴ ሳደደየ ምስል ተብጊሰትለ መኪነት እግል ወጠን፡ እግል ሳሕል ወእግል ነቅፈ ሰረን እት ረፈዐ ወሰረን እት ልትከበተ፡ ለአምዕል ቀዳሚት ምን አሰመረ እብ ፍላሽ ወእስፒክር እንሰምዑ ለዐለነ ሐልየት ፍርሰነት ወወጠን እለ አምዕል እለ ላተ ምን ሐለቅም አንሳት ነቅፈ እት ልትካተር እግልነ ጸብሐት በኪተት አጽበሐነ። ሕሊል ምያ ዮም ዓመት ምን ለዓሉ እት ተሓቱ እብ ንቃዕ ቅዙር ጀረው እት ልብል ዕንታትነ ደማን ወደገለብ ዲብ ለአትቃምት ሕሊል እንባልቀ ድገለብ እንዴ አትሌነ እብ ምግብ ጀምዐ ምብታክ ሸንክት ደማን አተንከብነ። ለምን ሕሊል ምያ እንዴ አሰተብዴት አስክ አግረዕ ለተሐልፍ ስከት መኪነት ህዩ እብ ሸሪከት ዐዲ-ሀሎ እንዴ ጠፍሐት ወእንዴ ፈይሐት መኪነትነ ምስለ ዲብ ቀበተ ሐንን ልብል ለዐለ ሐልየት ዲብ ትትፊተት እብነ ሼክ ክምስል በጽሐነ፡ እግል ካምለት ስከት ደማን እንዴ ሐደግነ ድገለብ ሸከፍነ።

ለከዛን ልትበኔ እቱ ለሀለ ሕሊል ጠብረ እብ አፍሁ እንዴ ጸበዋናሁ ነአቅሎሌ ዲብ ህሌነ ክሎም ለገዳይም አንፋርለ ጀማሂር ደማን

ወድገለብ ዲብ ልትዋለቦ ሕስ ባትካም ክም ርኤኩምም ሐጊገት ዲብ ዝክርያት ወሰርቤብ ሸሙማም ክምስል ህለው ሸክ ኢወዴኮ። አማኖምቱ ህዩ መብዘሐም ዲብ እለ ባካት እለ መጸእ ዲብ ህለው፡ ዕምሮም ምን 20 ሰነት ወተሐት መንደሊታት ወሸበንርብ ዐለው። ዕምር ንእሽከ ለተሓልፍ እቱ ስያብ ህዩ ዲመ ዝክርያቱ ምን ልብ ኢበዴ። እምበልሁመ ለዲብ እለ ባካት እለ ለሐልፈው እበ መራር ወክርበት ዙብጥ ዋያራት ወመትሞጠዕ ፈዋለል አባይ እበ ዎር እንክር ወእበ ካልእ ህዩ “ገቢል ልፍዘዕ፡ ልትነዝም ወልትዐንደቅ”



እት ልብሎ ዲብ ዐዝለተ ዐቅበ ወቅሰለ እግል ሸዑብ ሰሚናራት ወዱ ዲብ ህለው እግል ልትረአዮም ወእግል ልሰራብም ጠቢዒቱ።

አነ እግል ኖሼ እለ ሕሊል እለ ሐቆህ ዲብ ወሬሕ ሐምስ ናይ ሰነት 1977 እግል እናድል አስክለ ዲብ መሓዝ ጠብረ ለዐለ መዐስከር ጀማሂር ለጊሰኩ እተ አምዕል ትቅብ ትቤ እቼ። ለወክድ ለሀይቱ ህዩ እሎም ዮም ምስሎም እጀወል ለህሌኩ ጀማሂር እንዴ ትከበተውኒ ወሰጀለውኒ አስክለ ዲብ ቅብለት ሳሕል ዜሮ ለዐለት መድረሰት ሰውረት ለሳረሐውኒ።

ጠብረ ዲብ መደት ንዳል ለናይ ሰለፍ ዕያደት ድዋራት ነቅፈ ለተአሰሰት እተ ወለናይ ሰልፍ ዐመልየት ከብድ ለገብእት እተ ክምስልሁመ መዐስከር ጀማሂር ለዐለ እተ፡ ወምን ሰር 80ታት

ወሐር ህዩ መድረሰት ሰውረት ለዐለ እተ ታሪካይት አካን አው ታሪካይ መዐስከር ተ። ዮም እለ ሕሊል እለ ከዛን ዐቢ ልሸቄ እቱ ህለ። እለ ከዛን እለ ዲብለ ናይ ማሌ መሳክብ ጀማሂርቱ ልትበኔ ለህለ። አንፋር ጀማሂር ህዩ ዮም ቤጽሐት ወሰያሕዩን እንዴ ገብአው ልዳወሮ እቱ እት ህለው ዶል ትርኤ ሰድት ወመራር እንዴ ሐልፈት ወእስትዕማር እብ ሕርየት ወደማር እብ ዐማር እንዴ ትበደለ ገቢል ኤረትርየ ዲብ በኔ ወለዐምር አርዱ እብ ትራክተራት ዲብ ለሐርስ ወመሓዛቱ ወአወድጉ ዲብ ካሬዕ ስድ ትርኤ እበአማን ፍሬ ሕርየት

ጥዑም ክምስልቱ ኤተክ ኢትወዴ።

ክሉ ቤጽሓይ እት መሸንገለ ከዛን ክምስል በጽሐ ሙዲር ምዴርየት ነቅፈ አሰይድ ያቆብ እድሪስ እብ ክሰሰል ከዛን ተውዴሕ ሐጪር ሀበነ። ህቱ ልብል እለ ከዛን እለ ዲብ ምድር ታሪክ ወምድር ሰሙድ ልትሸቄ ለሀየቱ ዐውቱ ዐቢ ቱ። ለማሌ መስከብ ምሕርበት ወመካሪት ቀናብል አባይ ለዐለ አርድ ህዩ ዮም ዲብ ዐማር ውበነ እንዴ ትፈረረ ክእነ ለመስል ከዛን እግል ትርአው እበአማን ፍሬ ሕርየት ጥዑም ክምቱ ሸክ ኢወትዱ። እለ ከዛን እለ ትበነ ምንገብእ ፈንጎሕ ፈጅር እለ ምተሐቱ ለሀለ ጋድሞታት እት ሐርስ እንዴ ትበደለ ከረም ወሐጋይ አክደር እግል ልግበእ ህዩ ሰእየትነ ዐባይ ተ።” ቤለ።

ዲብ ገጽ 3 ልተላሌ.....

እፈትርየዐጸላክ

ክል አርቡዕ ለትጠ'በዕ ጀሪደት

መዳልያይ፡-

- መሐመድ እድሪስ

ለይአውት ወአርተዖት

* ዘህረ ዐለ

* ፋዋነ አድም

ተለፎን፡ 121797/201820 (258)

ፋክሴ፡127749፡ ዕ.ሰ.ቡ፡ 247

ተውዝዕ ጀሪደት፡

ተለፎን፡163471-07588045

አትአመሮት፡

ተለፎን፡ 125013፡ ዕ.ሰ.ቡ፡ 1284

ምን ሰብክ ዐስር ሐክ፡
ፈጅክት ሐቴ ዶክ

12^ኛ ክፈል

ዐሊ ዘረ እት ናይ ደንጎበ እት ሸበቅ እት በልሰ “ሕለፍ እተን ሐቕ ቴልክኒ እቅባለት አለብዬ ኣነ። አርድ ምን ጸልመት ክምሰለ እግለ ትርእዩ ፋክክ ህለ። ለትሓከረ ወለአስተሸህደ ቀደም ላሊ ሓሪት በክት አፍገርቱ ጨቢብ ቱ” በልሰ እቱ ወሐር እግለ ምድፊዐጂታትን አወላይት ብሬን ለዐለው ሸሂድ ሓምድ ቀይሕ ወጀከሚኖ አማይ አሹ ወሸሂድ አድም መሐመድ ኪነ እግል ልፍገር አማውር ፈግረት እት ለሀይሰም፡



ሸሂድ ሓምድ መሕሙድ ዐመር
እግላመ ካልኣይት ብሬን ሸሂድ ግርማይ ብሰራት (ዐጋሚ) ወሸሂድ ዐሰማን መ/ ዐሊ (መንሱረ) ወሸሂድ ጸጋይ ደስተ (ዐጋሚ) ወድ አምስቡ ገለበ ቶም ለዐለው አሰረ አወላይት ብሬን ፍገሮ ቤለዮም።

አስክዬ እት ገንሕ ወሀለው እት ልብል “እንተ ሼክነ እትሊ አንደር (ከንደግ) ጽነሕ” ቤሌኒ ከህቱ ምስለ ክልኤ መጅሙዐት ለሸሂድ ገሬ ኮከባይ ቀውደን ለዐለ አስክ ቅልንቄለት ጋንሕ እት እንቱ ነወል ወደ ምንዩ።

እሊ ሰድ እሊ መብህል ዐሊ ዘረ ቀደም ሐቱ አምዐል እብ ደሚርዬ እት እፈቅዱ ለጸደገ ጀዝመተ ህዳዩ ምን ረአየት ዕንቼ በዲ አቤት። እንዴ አትሌኮ ክልኤ እግርዬ ምኖም እንዴ ኢተርፈ. “ኣነ ዐሊ እትሊ ይእተርፍ። እትሊ ለገብኦ ጅሩሕ እግል ልምጽኢኒ ኢቀድር” እቤሉ ከአሰርም ገብአት።

“አቅብል እብላክ ህሌኮ መዐልም አዋውር ኢትጅፈ” ቤሌኒ ከረአሱ ኬን ረትዐ ምንዩ። ኣነ እበደን ይእተርፍ” እቤሉ፡ ከአሰርም እት እገብኦ አክል አሕድ እት ምምያየን ወለ ምውዓለን ለዐለት ምሽባብ ሀድፍ አስክ ድፋዐትን ሽብብ እንቤ እብ ሕበር። ምሽባብ ቅልንቄለት እብ ቀናብል እዴ ሞርታር እት እሳት ጀሀንብ ትቀየረት እት። ፊድዮታት እት አሕድ ጨጭ ቤላ። ቃእድ ከቲቦትን “ሀለው ሀዳናይ፡ ሀዳናይ ልክያሁ ወምትሀርሃሩ ፈጥን ወሌለ ከልኤ። ቀናብል መዳፍዕ ምን ረይም ወቅሩብ ሞርታራት ወደሸካታት ቀናብል እዴ ወቅጭሐርሙ ምሽባብ ቅልንቄለት እበነ እግል ነድ ለትፈረደት አተምሰለዩ። ሰብሓን አላህ! በሽርና ኢትርእዩ እብ አጨብል ወተናናት

ሕብሩ ቀው። ሕብር ሌጠ እንዴ ኢገብኦ አርወሐት ቀደም ሞት እት ትልገ ከልዕ ፋልሕ ዐሎበጠት። ናይነ መዳፍዕ እግል ልክፈን እት ለአከምት፡ ወናይን እግልን እት ልሀድፍ ዕንታት እብ ዕሎሰጊት ወተናን። ወእዘን እብ አክራን መዳፍዕ ወመውዒታትን ወምትሀርሃረን ቤን ኮፍ ወፈረጅ እት ትልገ ሞት ትክረፍን። ምን ሞት ለልኦትሃርብ ላቱ እት ክምሰል እለ ኢልትከሬ፡ ለዐበ ሀደፍነ ሰከይ ምን እስትሸሃድ ኢኮን ለዐሉ፡ ከፎ እት ሀደፍክ ትትዐውት ቱ ለዐለ እንዴ ኢኮን።

ሐቕ ሐምስ ደጊገት ምን እትዩት። ወሀዳናይ ዐሊ ዘረ ወአነ፡ ጽግም እት ለዐልነ ቅልንቄለት ህቱ እብ በግሩ ወእነ እብ ግሳይዬ፡ ቃዝፈት ሞርታር ህተ ሰበት ትከሬት እት ክምሰል በዲር ኢትክለቀት ገብአት። ላመ በዐለ ረያም ብጥረት ወጽዐደ ጀዝመት፡ ህቱ እንዴ ኢልትገሌ ለእት እዲሁ ዳብጠ ለዐለ ፊድዮ እትሳል ህተ እንዴ ሸፍገቱ ክእት ረአሰዬ ወድቀት። ኣነ “ትገሌ ዐሊ” እንዴ ይኣትካርም፡ ለራዲ እት መቅደምዬ ሐጸ ድፋን እት እንቱ አቅመትሁ። ላመ እት ሐንቴህ እንበጥር ለዐለነ ቅልንቄለት እት በል ሸም ምን ረአየት ዕን ምክራዩ ትቀዌት። ክለ ለአካት እበ ወድቀ እት ቀዛይፍ አሰለሐት፡ ወለዘልመ እት ረሳሱ፡ ኣነ እት ፍክርዬ ለቀደም ሐምስ ደጊገት ለዐለት ሓለት እንዴ ትረሰቦሁ፡ እት መዐረክት እት ቀበት ጊማይ ነህጅም ክምሰል ዐልነ ልትክዩል እግልዬ ዐላ። ወለ አስክ እለ እብ ክምሰሌሁ እፈቅደ።

ህተን ወድቀት ዐሊ ሰበት አግረሰዩ እግል ልንሰአሁ እት ልትጃኮላ። ኣነ ምን ሐር ተርፈው ወለ ቀደም ረትዐው እት ጀዘረት እሳት እብ በይንዬ እኪት ለእፈቲዩ ቃእድ ሰርዮትን አትሓወለደ።

እግለ ዋድቅት ለዐለት ራዲ እንዴ ሀረሰኩ፡ ከእት ቦርሰፍ አቱህ፡ ሀዳናይ እት ትትላኬ። እግላመ ክፋፋ እት ረአሰ ክፋፍዬ ትዐንደቅሁ። ለዐበ ዳይነ እግለ ጅሰቱ እግል ኢልንሰኦ ምንናቱ ለዐበ ጸግማ። ኣነ ግድም እግል በክት ሐረከት እርከብ እግለ እት ክፋፍዬ ዐለዩ ክልኤ ቅንብለት ሚለሊት ወሐቱ ለኢልትሐመለ ምን እቱ ዐልኮ አሰ አስክለ በዐለ ብጥረት ሮማይ ዋድቅ እት ለዐለ አንፍ ቅንቄለት ከኒሰት እንዳ ተወልዴመድህን፡ ለአሸቀ ለዐለዩ አገሙደ ጃሽ ረአሰን ትሐት ሄብኩን ምንዩ።

እግል እት ጅፈርዬ ሳትር እንዴ ጸብጠ እብ ከላሸን ልትሓረበን ለዐለ ወድ ፈሰለትን ሰረቀ ሀብቶም እግሉ እንዴ ነቀም። ምስል እግል ዐሊ እንዴ ረፍዐናሁ እት እግል እትረፍ አማውር ሃይብዬ እት እንቱ አማውሩ እንዴ ጀፊኩ፡ አቲ ለዐልኮ ለእት ሐንቱ ምድር እንዴ ትሐፍረት እት አንፈን እንዴ ገብኣነ ነኣትቃምት ምን ለዐልነ ከንደግ፡ አብጸሐናሁ።

ጀማሂር ሳሕል እት.....

ምን ገጽ 2 ለአተላላ.....

ሐቕህ ዲብ ከዞን ለገብኦ ጀውለት ህዬ፡ ምን ሐዲስ ነቅፈ እንዴ አቅበልነ ዲብለ አካን እጅትመፅነ ለዐለ መንተዘ ሸባብ ነቅፈ ለታርፍ ዐለ በራምጅነ እግል ነኣተላላ ህጅክ ረአሰ ጀበነት አስተብዳኤ፡ አሰልፍ አትማር ምስል ነፍሱቱ ለዐለ። መብዘሐም እትሊ ወክድ እሊ ዲብ መሕበር ጀማሂር ሳሕል ሰጃላም ለህለው ሸባብ ህዬ እግል ልውረሶ ገለድ እንዴ አተው ፊነ ጀማሂር ማሌ እግል ለአትምሙ ክምቶም አከደው። ምስል ህጅክ ረአሰ ጀበነት ለገደሰ ብሰድ ዲብ መደት ንዳል እሉም ዮም መሕበር እሱሳም ለህለው ክምሰል ውላድ ምር አብ ወምር ርሕም እብ ፍቲ ወምሰንዮት ዲብ ሮረ ወቀላቅል ምስል ለዐይሾ ወምሰል ተሐይሰ ተሐምቅ ልብሎ ለዐለው ዮም እትሊ ሸቦቶም ለሓለፈው እቱ ምድር ክእነ መስል ጀውላት ወዱ ዲብ ህለው። ጉንም እግል ልስከብ ላብድ ቲ። ንካት አጠመሂቶ ወድግም ታሪክ ህዬ ምር ምን በርናምጅ ህጅክ ረአሰ ጀበነት ቱ ለዐለ።

እምበል እሊ ሰር ምኒነ ለእብ መሻረከት ሸዐብ እብ ኪወ አስክ ደንደን ለትፈግር ወልሰዕ ትሸቂ ለህሌት ስከት እበ አስክ ደንደን በጽሐነ። ለገበይ ምን



እንዴ ጸረው ምን ሕሊል ምን እበ ታኪ ወሰዱድ አግቡይ ዲብ ለአሳሎ ፈጉሩ ለዐለው ምሕርበት ዮም እብ ፈድል ወራታት ኪወ ገበይ መኪነት እንዴ ትቀፈረት እቱ እት ረአሰ መኪነት ሸን እት እምብል ፈገርናሁ። ለስከት ታርፈት ምን ለህሌት ሐጫርተ። እትሊ ወክድ ቅሩብ እንዴ ተመት ህዬ ርሽመቱ ትበጽሕ ትገብኦ። እብሊ ደብር ደንደን ዮም ምድር ሲያስሐት ጋብኦ ህለ። አናመ ለበዲር አምሩ ዐልኮ ዮም ክእነ ክምሰል ረኤኩው ሰኒ ተዐጅብኩ። እግል ትወለድት እቱ ሮረ ሐብብ ምን ቃብል እት አቀምት ህዬ ለድዋራት ሰኒ ጀዝበኔ።

ልትዋገር ለዐለ ቀናብል ዮም ዲብ መንዘል ሲያሐት እንዴ ትብደለ ጀማሂር ማሌ ሲያሕዩን ዮም እንዴ ገብአው ልጀውሎ እቱ ህለው። ለዲብ ክል አካን ፍንጡር ለዐለ ወዲብ ረአሰ ምናድሊን ልትብደድ ለዐለ ቀናብል ወጅሌል ህዬ ዮም ምን ዐለ እቱ አካናት እብ ጨበል ጀላብ እግል ኢልደፈን እንዴ ትብህለ ዲብ ሐዬ እምር ወክሎ ለልርእዩ እት አካን እብሉትፈናት አሸካል እንዴ ትከውነ ክሉ ደለ ጌሰ ወበጽሐ ለዐፍዩ ለህላቱ። እግል መሰል ለዲብ ባኮት ፍዴል ፕ ክወን ለህለ ጀሌል ህዬ ሰመዕ በሲር ናይ እሊቲ።

አማንቱ ዘበን እንዴ ትብደለ ለናይ ማሌ ዲብ እሊ ድፍዳት እሊ እንዴ ሸፊው ጀላብ ሸዐብ ወወጠን ናድሎ ለዐለው ምሕርበት ዲብ ተሓረበው፡ ዲብ ትጃረሐው ወዲብ አስተሸህደው። ዮም ሐቕ 35 ሰነት ሕርዮት ህዬ አሰርም ወራታት ዐማር ወሽፊ እቱ ህለ። ለዲብ ክል አካን ሸቱት ለዐለ ዓጭሞታቶም ህዬ ዲብ ሐቱ አካን ወእብ ፍንቲት ዲብ ፍዴል ፕ እንዴ ትጀመሪ እብ ሕሽመት መስከብ አማኑ ዳብጥ ህለ። ለዲብ መቅበረት ሹሀደ ድፌል ፕ እብ መሓብር ምናድሊን ለተክለ ዕጩይ ህዬ ሰመዕ በሲር ናይላ እት ሹሀደኣነ ለባናቱ መትኢዮስ ለርኤ።

ሐቕ እለ ለናይ ደብር ደንደን ጀውለትን እንዴ አትመምን አስክ ነቅፈ አቅበልኤ። ናይ ምሴት ህዬ ታርፍ ለዐለ በራምጅነ ትልህያ ወፋጎዮት እንዴ ኢነአሰብዬ፡ አሰልፍ ለእብ ትግረይት ትርጃም ለህለ ደሰቱር መሕበር እብ ሳልሕ አብሐረሽ ክምሰል ትቀደመ እግልኤ፡ ደርቡ ፍርቀት ዓዳት ቀይሒት ዕንባብ ነቅፈ ለትፈናተ ሕላይ ሐጠር ወፈራሰት ሕላይ ወጠን ወዐማር ተአሰመሽኩ አምሴት። ዲብ ደንጎበ ህዬ ከሊመት ርኢሰለት ቦርድ መሕበር ጀማሂል እንዴ ተቀደመት ለናይ ዮም ዓመት ጀውለት ጀማሂር ሳሕል ተመት። እብ ክእነ ህዬ ጀማሂር ሳሕል ዲብ መሳክብ በዲርም እንዴ ትጀወለው እት ሳልሳይት አምዕልነ ዮም 6 ወሬሕ 4 ሰነት 2025 ጽብሕ ምድር ሰንበት ዐባይ ምን ነቅፈ አስክ አሰመረ አቅበልኤ።



ፍዴል ፔ እንዴ አስተዳት እግለ ዲብ ባኮት ለህለ ሕዘዕ አው ቀትረ ለእብ ሸዲቅ ወሰዐር ለተገልበበ ደዋራት ድፊዕ ዲብ ነወፊ ወግለ ጋምል ምድር ዲብ ነኣትቃምት ምስል ዲብ ርሸመት ደብር ደንደን ለአግመምእ ለዐለ ግዩም ጀውለት አስክ ደብር ደንደንመ ናየ ፍንቲት ዝክረት ሐድገት እት።

ኣነ ደብር ደንደን ቀደም እለ ዓርጉ ደኣነ ሳኪን ዲብ ሰነት 1987 ምን ዘፎ ነቅፈ እንዴ መጽኢነ እግለ ሕሰብ ለዐለ መግርክ ዲብ ንዳሌ፡ ሳምን እብ ግዲደ እብ ጊማይ ሰበት ትገልበበ ለደብር ሚ ክምሰል መስል እግል ነኣምር ኢቀደርኤ። እት ወክድ ለህይ ደብር ደንደን ላሊ ወአምዕል ህለ ለትብህለ ሰለሕ አባይ ዲብ ረአሱ ዘልም ዐላ። ዕጩዩ ሌጠ እንዴ ኢገብኦ ክምሰል ምሕርባይት እምነ ዜነብ ያሲን ለቲለተ። ኤረትርየ ኢኮን ሸዐብ እበናመ ነድድ ህለ ለቲለተ ደብር ደንደንመ እመኑ ነድድ ወተንን ዐላ። ዮም ሳኪን እብ ዕጩይ ተሰላ፡ ቀረጽ ውበዕድ ዕጩይ እንዴ ትገልበበ ዲብ ድብከት ደማር ዐማር ለትርኤ እቱ ደብር ጋብኦ ህለ። እብሊ ህዬ ለማሌ መስተዋም ወሲፋህም እት መርከም

ሐቕ መደቲት ዲብ ደብር ደንደን ህዬ አስክለ ትበገሰን ምን መዲነት አቅበልኤ። እት እግር ገበይነ ህዬ እግለ ምናድል ዲብ ወክድ ንዳል” እብ ለህበትን ንሕፈዝ ደምነ” እንዴ በሊው ምን ምድር ረዩም ዝዲት ገዳይፍ እንዴ ረፍዐው ወላሊ እብ ግዲደ ምድር ቀደኣሽ ዲብ ለአብሎ ዲብ ሐንቱ ምድር ዮም እግል ትእመኑ ለኢተቀድር ሰዋትር ሰባት ለሸቀው ምናድሊን ለከው ሰዋትር ዲብ ነወፊ ወእግለ ዲብ ክል አካን ፍንጡር እንዴ ዐለ ዮም ዲብ ምር ባኮት ልጀመዕ ለህለ ጅሌል ወክባሲል ሰለሕ ዲብ እንረኤ ህዬ እለ ጀውለት እለ ሰኒ ዐጀብተኒ ወአይሐተኒ። እሊ ጅሌል እሊ ክሉ ዲብ መቅጠን ምሕርበት በርድ ለዐላቲ። አማንቱ ለማሌ እግል ቀትል ምሕርባይ



ሙሰውርጉ አቤል በረከት

ሰሐፊ መሐመድ እድሪስ ምስል ጀግንነት ሰሐፊዎችን ቅስም ጀራይድ ዲብ መአሰሰት ተዋብ ንዋይ ወዘርእ፡ ከም ሙወዘራን ከድሞ ለጸንሐም ምን ኩልየት ሐመልማሎ ተከሰሰ ሐርስ እቡ ለደሐረው እብ ሰበት ሽቅሎም ወለ ራክባሙ ለህለው በክት ከም ኦትሃገም፡ “ዲብ ረአሰለ ደረሰናሁ ዝያድ አምር ወሰክነ” ሕት ልብሎ በልሰው እቶም፡ ናይ ሱም መውድሶነ ህይ ዲቡ ለረከዘ እግል ልግበእቱ።

መሐመድዐሳማን መሐመድ መሐመድ በዐል መቅደረት ሐርሱ ዲብ ሰነት 2005 ምን ኩልየት ሐርስ ሐመልማሎ ለትከረጃ ነፈር 19 ደውረት ከድመት ወጠንቱ። እትሊ ወክድ እሊ ህይ እብ ለደርሰዩ መጃል ሰልፍ ዲብ ናይ ተመር ሐቀሁ ዲብ ናይ ሽቅል አዜ ህይ እትሊ ናይ አፍሂምሶል ሐርስ ከም ፈን እዳሪ እንዴ ገብአ ከድም ህሉ። እሊ ሐርስ አፍሂምሶል ምዶል ተአንቡ ወዲብ ሚ ሐሊት ህለ እት እንብል ከም ሰአልናሁ?

እሊ መሸርዕ እሊ ዲብ ሰነት 1999 አሰብደ። ለአሰብደ እንዴ ህለ ለመርሐሊት ሰኒ ክብድት ወናይ ሕሩባት ወክድቱ ለዐሉ፡ ሕኩመት ኤረትርዩ ላኪን እተ ሰዱድ መራሕል እንዴ ኢተርፍ ወጠነ ሕነ ምን ብዕዳም ትትታኪ ነፍሰነ ለእንቀድር እቡ አግቡይ ዲቡ ሰበት ረክዘ። እሊ መሸርዕ እሊ እብ ረይ ወከረም ለገምል እቡ እግል ልግበእ ተሐሰብ ወትብገሱ፡ እትሊ ወክድ እሊ ህይ ሐድ 1000 ሄክታር እብ ረይ ወእብ ከረምመ ለልትዘራእ



መልክ ህለ። ሽቅልነ ህይ መውሰም እንዴ ኢፈንቴ ሰነት እብ ግዲደ ለልትሸቂቱ። አዜ ለህለ እግልነ 100 ሄክታር ጠግጥም፡ 10 ሄክታር ድቡ፡ 10 ሄክታር ብርጪቅ፡ በሰል ወበርበሬመ ህለ እግልነ እብ ዓመት ሐድ 150 ሄክታር ዲብ እትየት ህለ። ምስሉ እግለ ለህለ እግልነ ንዋይ ለገብእመ ሰዐር እንዘርእ። ከም ሙወሰም ህይ አዜ ዝያድ ዲብ ጠግጥምቱ ተርኪዝ ዋድያም ለህሉነ

ወአሰክ መሰናዕ ሳልሰት ነአበጽሐ። ዲብ እሊ መአሰሰት ለሸቁ ምንቶም?

እትሊ ለሸቁ ሐድ 120 ለገብእ ሽዑብ እዳረት ደሕየት አፍሂምሶል ወአንፋር ዴሽ ቶም። ለሽዑብ ዲብ እሊ ለሸቁ ህይ ናይ ሰላዲ ወእክል እት ክል ወሬሕ ከም ክድመቱ ድፍዕየት ረክብ። እሊ ሽቅል እሊ እግለ እግል እሸቁቱ ለልብል ፍረስ ለልህይብቱ ከም መሰል ሐቱ ዓኢሊት አሰክ እብ ሰለሰ ነፈረ ምን ትትፈረርመ ክል ምኖም ከናዩ ለህበት እብ ቅያስ ክድመቱ ልትህዩብ። ምነ ረከቡ ማል ህይ ዝያድ አምር ሽቅል እግል ልጠውሮ ሳዲሆም ህለ። በዲር ሽዑብ እሊ ባካት እብ ርዕዮቱ ልትናበር ለዐሉ፡ ጠሊቱ እንዴ አገበዩ ህይ እክል ለአተርብ ዐሉ፡ አዜ ላኪን ሐርስ አመረ ወትብት ወራዕዮት ንዋይመ እብ ለሐሰት ገበይ እግል ልራዔ ለቀድር እቡ አግቡይ እግል ለአምር ቃድር ህለ። አሰክ አንሳት ናይ እሊ ባካት ኦብእስተን ለህሉ ወምን ኢልህሉ ዲብ እሊ ሽቅል እንዴ ትፈረረዩ እክል ወኩዳር እንዴ አመረዩ መናበረተን ለልሐሰነ እቱ ደረጀት በጽሐት ህለዩ። እሊ መሸርዕ አፍሂምሶል ዝያድ ለልትአመር እቡ ህይ መሰናዕ ሳልሰትቱ እሊ እግል ዐድ ወጠን ምን ዕምለት ካርጅ እቡ ለልአቱ ለለአንቅስ ወጠለባት ቀበት ዐድ ምን ቀለ ወሰኢን ለልአድሕንቱ።

አሰይድ መሐመድ ዐሳማን እትሊ መሸርዕ እሊ እብ ሽቅየትክ እንተ ህይ ሚ ተቅይር አምጽአክ?

በዲር አነ እብ ነዘርቱ ለደረሰኩ እብ ፍዕል እርእዩ እት ህሌኮ ህይ ለፈርግ ብዘሕቱ። እግልሚ ለነዘር

እቡ ለደርሱ እብ ፍዕል ዶል ትወድዩ ብዘሕ ፈርግ ትረክብ እቱ። እሊ ለህሉነ እቱ ባካት ብዘሕ ሕፍንቱ ዲብ ለዐል ላኪን ለጀው ብሩድቱ ከለ ተጅርበት ዲብ ለዐል ለወዴክ ወእንሰር ለትወድዩ ሐቱ ኢትመጽእ ለሓሊት ለሐመሊት ተክተልፍ፡ እብሊ ህይ ተጃርብ ወድራሰት ረከብዮ። ምነ ለደረሰክም ዮም እብ ተጃርብ ለአምሩ በዘሐ።

እሊ ዲብ እሊ ባካት ለህለ ሽዑብ እሊ ራክብ ለህለ ፍርሰት ልትሃፋዕ

እብ ህለ መክላፎ?

ሽዑብ እሊ ባካት እሊ ራክብ ለህለ ፍርሰት እብ ዓመት እርእዩ እት ህሌኮ ብዘሕ ልትሃፋዕ እብ ኢህላኒ። እግልሚ ትቤ ምንገብእ፡ ለበዘሐ ሽዑብ አሰክ እሊ ሻርክ ኢህላኒ። ተቅይር እምጽአም ለህለው ለእንዴ ረአው ወአመረው ሻርኮ ለህለው ላኪን ብዘሕ ፈሀም ከም ረክበው ዲብ ናይ ክልዮም ግያሶም ትርእዩ። ሕነ ህይ እግለ ለኢአመረ እግል ለአምር ወልምጸእ ብዘሕ ተዕቢኣት እንወዴ ወለ በክት ዝያድ እግለ ሰብ ዐድ ነሃይብ። ለህለ እግልነ ፍረስ ሽቅል ህይ ምስል ሐርስ ተዋብ ንዋይ ዋድያም ሰበት ህሌነ ዲብ ክሉ ከም ሻርኮ ገብእ። ሰበት እሊ አነ ለእብሊ እሊ ራክባሙ ለህለው በክት እግል ለአሰተፊዶ ምኑ እትፋኔ።

ሰሌማን እብራሂም መሐመድ፡ ምን ምዲርየት ሐልሐል መላብሉ ዲብ ሰነት 2014 ዲብ እሊ መሸርዕ እሊ ለመጽአቱ ምን እብ መዳፈት ተክል ህይ ምን ክሉልየት ሐመልማሎ ለትከረጃቱ። እትሊ መሸርዕ እሊ ሚቱ ሽቅልክ እት እንብል ከም ሰአልናሁ?

እትሊ መሸርዕ እሊ ሕማም ናይ ሽቅል እግል ኢልሳድፍ ወሳደፈ ምንገብእ ከአፎ ልትሳሬ ዲቡ እከድም። ለበዘሐ ዲብ እሊ ለልትርኤ ህይ ፈንጋሱ፡ ናይ በልዲን ወባይረስ ሰለስ ሕማምቱ ለህለ። እሊ ህይ እብ ለህለ እግልነ ደወ እንዴ ወዳነ እንካፍሐ ህሌነ። ለሕማም ለልትአምር እቡ ህይ ለሽቅል ከም ርኡናሁ ሚ ኖዕ ሕማም ጸብጡ ህለ ነአምር፡ ሐቀህ እብ ለህለ እግልነ ደወ ናይ ባይረስ ገብአ ምንገብእ እግሉ ለቀትል ሰበት ኢህለ ድድ ሃረም

ለገብአ ደወ እግሉ ዶል እንወዴ ለባይረስ ለልትፋሬ እቱ ሰበት ተአበዴ ህቱመ በዴ። ለህለ እግልነ ደወ ህይ ካሬቱ። ለበዘሐ ሕማም ለልትርኤ እቱ ተክል (ሽቅል) ህይ ዝያድ ዲብ ጠግጥምቱ ዲብ በሰል ብዘሕ ኢኮን። ዲብ ዱብመ ልትርኤ እት ብርጭቅ ህይ ደሐንቱ። ለሕነ እንወድዩ መራዕየት ህይ ናይ ክሉ ሐመሊትቱ።

እብ ለደረሰኩ መጃል ትክድም ህሌክ ኩዲብ እሊ ኩዲምክ ተጠውር

አምጸእት ትብል? ምን ተጃርብክ ህይ ሚ ተውሰየት ተሓልፍ።

አወል ዲብ ኩልየት እብ ነዘርቱ ለእሉ ደረሰነ አዜ ህይ እብ ዐመል እንሸቅዩ ሰበት ህሌነ አነ መክተነዕ አነ። ዝያድ ህይ ምስል ቀደምዬ ለጸንሐውኒ ምኖም እት እርኤ ተጃርብዩ ዓቤ ወእግለ ግራዬ መጽአ አወርስ ህሌኩ። ዲብ አክር ህይ እግል ኢበለ ለሐዜ ክሉ ሐረስታይ እግል ለአምሩ ለወጅብ ለሕማም ናይ ሐመሊት ዲብ ወክዱ ህይ አገድ ሐብሬ እግለ ከሰሰ ጀሃት ሀበው ምንገብእ ለእሉ ዛርኣም መዳፍዐት ደወ እግል ልርከቦ እግሉ ቀድሮ። ወክዱ ሐልፈ ምንገብእ ላኪን እግል ትዳፍዑ ክቡድ ሰበትቱ መደረት እግል ትምጽኡ ቀድር ሰበት እሊ አገድ ሐብሬ ሂበት ለትሐዜ። እግል ሽባብ ለእብሊ ህይ፡ ክሉም ሽባብ ናይ ዐድነ እተ ዲብ ወጠኖም ክሉት ለህለ መአሰሳት ተዕሊም እግል ልድረሶ ወእንዴ ደርሰው እግል ርሐም ወወጠኖም እግል ልግብኦ ከምሰልዩ ወእግልዩ ለመሰሉ እግል ልርአው እትፋኔ።

ሳልሕ አድም መሐመድእድሪስ ምን ምዲርየት ሀበር፡ እት መንጠቀት ዐዱ ሀበር ጸሊም ሐቀለ ደርስ ተዕሊሙ እግል ለአተላላ ዲብ መድረስት ዐሪታይ ሐቀህ ሳወ ትከረ። ምን ሳወ ትቅጠት ናይ ዲግሪ እንዴ አምጽአ ዲብ ኩልየት ሐመልማሎ አተ ወእብ ናይ ሐኪም ንዋይ ምህት እት ሰነት 2014 ትከረጀ። ከሸቅሉ ለከሰሰ ሰአላሙ ዐልነ?

ዲብ እሊ መሸርዕ እብ ናይ ንዋይ ራዕዮት በህለት ለህሌት እግልነ አባግዕተ ለኖዕ ናዩ ህይ ሃመር ልትበህል ዕልበ ሐድ 305 ረአሰ በጽሕ። ምን እሊ መሸርዕ እሊ ህይ ሰዐር ልግበእ ወተረፍ ናይ ጠግጥም እሉ ትብልዕ፡ አርበዕ መደንይን ሽቃለ ህይ ለአውዑ ህለው። ሐካይም ሰማን ነፈር ህሌነ ደረጃትነ ህይ እብ ዲግሪ፡ ዲብሎም ወሸሃዳት ለደሐርነ ሕነ። እትሊ አባግዕ እሊ ዝያድ ለልትርኤ ሕማም ህይ ዲብ ወክድ ከረም ፍርማይ ለልትበህል መጽእ እሊ ሕማም እሊ ህይ እብ ፍድኢት ልትሳሬ ለንዋይ ህቱ እንዴ ኢጸብጡ ፍድኢት ልትሃዩብ። ወብረት ሐርስ ከረም ከረም እንዴ መጽአውነ ምስልነ ልትሳዕዶ ፍድኢት ቀደም ክልኤ ሳምን ተህዩብ ምንገብእ ህይ ለሕማም ኢጸብጡኒ። ብዕድ ሕማም ዛህር ምን እመጽእ እትሊ ንዋይ ርኡይ ዩአናኒ።

እትሊ እንዴ ደረሰክ መጽአክ ኩተጃርብ ወሰኩ ትብል ከአፎ ህሌክ? እሊ ንዋይትም ህይ እንታጃ ከአፎ ህለ?

ወሰክ ዲብ ኩልየት ለደርሰናሁ እብ ክታብት ቀለም ሌጣቱ ላኪን ዲብ ሽቅል ከም ትፈረርክ እብ ፍዕል ትርኤ፡ እት ሽቅል ከም ትፈረርክ ህይ ተጃርብክ እት ለዐቤ ገይሰ ምስል ድራሰት እግለ ደረሰክ እንዴ አትመጣወርካሁ ተግብዩ። አነ



መሓመድ ዐሳማን



ሳልሕ አዲም



ሰሌማን ኢብራሂም

ለደረሰክዉ ህይ ምን ዲርሆ አሰክ እንሰ አይ ንዋይ ለከሰሰ ዐሉ። እትሊ ከም መጽአኮ ህይ አባግዕ ሰበት ጸንሐተኒ እትሊ ሐርስ አፍሂምሶል እግል እራቅብ ወእራዔ ህሌኩ።

ንዋይነ ነቲጀቱ ዶል እርኤ ህይ ምን ሕማም ለትሳረ ንዋይ ላዘም እንታጅ ለህሌ እግሉ፡ ሕማም ለብዲቡ ንዋይ ላኪን ሐሊብ እትረክብ ምኑ ወሰን፡ ሳመ ረአሱ እግል ትርክቡ ኢትቀድርኒ ሰበት መይት ምንክ። እብሊ ሕማም መጽአ ምንገብእ እንራቅቡ ወደወ ሰበት ብነ እንሳርዩ። ምሴ ወፈጅር ህይ ምስሉ ሰበት ህሌነ ለገብእ መደረት ኢትመጽኡኒ። ሰበት እሊ መራዕየት ገብእ እግሉ ሰበት ህሌኮ ነቲጀቱመ ሰኒ ህሌት። ለዲቡ ልትፈረር ለህለው ተለኛ ህይ ለህቡቶም ረክቦ ወመራዓየት ንዋይ ዋውርት ደርሶ ህለው። ለዲብ እሊ ባካት ለህለው ሰብ ንዋይ ህይ እግል እሊ ናይነ አግቡይ እንዴ ረአው ንዋዮም ዶል ሐምም እግልነ ለሰእሉ ወንዋዮም አግቡይ ሰኒ እቡ ከም ረዕዉ እንዴ ልፍህዋ ገይሶ ህለው። እብ ጃንብ ናይነ ህይ ደወ ብና ምንገብእ ነሃይዐም ወመክር ለትሐዘዮም ገብአ ምንገብእ እንመክር ወአሰክ ወብረት ሐርስ እንዴ ገሰው ደወ ከም ለአምጽኦ ነአርእዮም።



1^ይ ክፈል

ለናይ ደንጎበ ወራር

ሐቀ እንሰሐብ ምነ እት ወሬሕ ጁላይ 1985 ሕርርት ለዐለት መዲነት ባርንቶ ተ። ለወክድ ለሀይ ተሕራር ባርንቶ ወግራሁ ለዐለ ሕሩባት ክምሰልሁመ እንሰሐብ ምነ መዲነት እብ ክርን ገበልቱ ዲበ እብ ካቤት ጸሓይ ሀሎይ ልብል ለዐለ ጋድሞታት ሳሕል ወእብ ፍንቱይ ድገለባይት ጀብሀት ነቅፈ ባካት ሚሾ፡ ዐገት ወመሻብብ ፈልኩት እንዲ ገብአነ ለሰምዐናሁ።

እሊ እንሰሐብ እሊ እግለ ዲብ ረዩም ለዐልነ ላተ ሰኒ ነክዳነ። ሐቀ ተሕራር ባርንቶ ተሕራር አቅርደት ወብዕድ አካናት ዲብ ንታኬቱ። ከበረ ኢትጸበርናሁ እሰንሐብ ለሰምዐነ። እትለ መደት እሊ ፈሰለትን ፈሰለት ሆንደሰት ዲብ ደባብ አባይ ከይዱ ለእምቤሉ ባካት ሚሾ፡ ፈልኩት ወዐገት ክምሰልሁመ አሰክ በሐር ለገይሰ አግቡይ መካይን ክሉ እብ አልቃም እንዲ ረጀምናሁ። ሕናመ ምነ ባጽሓሙ ለዐልነ ድዋራት ፈልኩት አሰክ መበገሰነ ለዐለት ደብዐት አቅበልነ። ዲብ ደብዐት ላኪን ብዙሕ ኢጸንሐክ። ወሬሕ ሴዕ ግራሁ እንዲ ሀቤነ ወሬሕ ዐሰር ክምሰል አሰተብዳነ ላተ ክሉ መዳሊትን እግል መዳፈዐት ሐዳሰ ዐለት። አልቃም እብ ብዝሐ ምን ድጌ ሰውረት ዲብ ልትጎረት እትነ ህዩ ክሉ አባይ እግል ልብጽሐ ወሊኪዱ ቀድሮ ለእምቤሉ ጋድሞታት ወግምንራራብ በሐር እግል ንለቅሙ አሰተብዳነ። ለወክድ ህዩ ምስለ እግል ወራር ሐዲስ ልጠባጠብ ለዐለ ጄሽ አባይ ዲብ ንትባደርቱ። እት ዘርእ አልቃም ፍሩራም ለዐልነ።

ፈሰለትን ዎሮ ሞተር ህዩበ ሰበት ዐለ። ወጋድሞታት ሳሕል ህዩ ወጡይ ሰበት ቱ ሰሩ ለአልቃምን እብ ሞተር ዲብ ንትፈረር። ወሰሩመ እብ መጽዕን በህለት እንሰ ወመካይን ዲብ ንትበገሰቱ እንደፍኑ ለዐልነ። ለወቅት ህዩ ምህለት ወራሐት ለሀሀይብ እንዲ ኢገብእ ወቅት ብድረ ምስል አባይ መስል ዐለ። ጄሽ አባይ እግል ለአጅግረናቱ መ እግል ነአጅግሩ እንዲ ይእንደሌ ዲብ እብ ተንዚም ለተሀየቤነ ዳይ ፍሩራም ለዐልነ እቱ ወክድ ቱ።

ዮም ጅምዐት 4 አክቶበር 1985 ምነ ዕስኩራም እት ለዐልነ ደብዐት ፈሰለትን እብ ከማለ መርበዩ ለኢደሌነ ሽቅል አመት ክምሰል ህሌት ምነ ህዩብነ ለዐለ መዳሊት እግል ንፍሀሙ ቀደርቱ። ሐቱ ሐዳሰ ኦራል ወብናይት ትዮተ ክምሰልሁመ ቃእድ ሆንደሰት ዐስከርየት ላቱ ተሰፋይ ቀየሕታይ እግል ልታኬነ በገሰ ንዳሌ ዐልነ። ለኦራል ምነ አልቃም ለትመለኦ ሰናዱቅ ዲብ እንረሰስ መልኦናሁ። ምድር ክምሰል መስ ህዩ። ቃእድ

ፈሰለትን መሕሙድ እድራሰ “የለ ደረሮ እግል ንትበገሰቱ” ለልብል አዋምር ክምሰል ሀቤነ ለንትበገሰ እቡ እትጀህ እንዲ ይእንደሌ። አመት ድራርን ገብአነ። እሊ ወክድ እሊ ጸሓይ ልሰዕ ዲብ እብ ጀህት ምፍጋር ጸሓይነ ለህለ ወቁል አድብር አርዔ እንጮጫሐያይ ልትረኤ ዐለ። ሐቀ ድራር ዲብ መቶረ እንዲ ሀረሰት ራንራን ትብል ለዐለት መኪነት ዐስከርየት ትጸዐነ። ክል ዎሮ ከመጋሰቱ ክምሰል አዋፈሐ። ሕነ ወለቃእድ ከቲበት ሆንደሰት ለዐለ እት ትዮተ ደርብ ሕድ ሽንክት ቅብለት ቀነጽነ። እሊ ወክድ እሊቱ ክል ምኒነ ከእብ ልቡ ለሰፈር አሰክ “ ነቅፋቱ ገብእ ሚ አሰክ በርከ እግል ሊበል

አሰክለ ፋዬሕ ጋድም አልጌና ክምሰል ተሀንፊት እብነ። ክሉ ለእምብሉ ቀደነ። ጋድሞታት አልጌነ ረገበት ቅብለት ሳሕልቱ። ቅብለት ሳሕል ህዩ ምን ትትሐረር ዝያድ ሰነት እድውርት ዐለት። ጄሽ አባይ ምን ምድረ ወበሐር ክምሰል ትብበት ምን ልጠየም ዝያድ ሐል ወሰር እድውርት ሰበት ዐለት። አዜ አንፋር ሆንደሰት ዲብ እሊ ሕሩር ምድር እሊ ሚ እግል ንውዴ ክምቱ ኢትፈረገ እግልነ።

እሊ ወክድ እሊ ለትዮተ ዶል ግራነ ውዶልመ ቀደምን ዲብ ተሐልፍ ለሰፈር እምብለ መርሐነ ለዐለው መስኡሊን ለአምሩ ዐለ አለቡ። መካይንን ምን ምክራይ ሐርመት ግርይቶ



ፈሰለት ሆንደሰት (ቀብር ወእት 1985)

አሰተብደ። ሰፈር ዘበን ንዳል ላሊቱ። እሊ ህዩ ሕጃብ ምን ዕን አባይ ወምን ጸሓይ ቱ ለዐለ። ጽልመት ህዩ መለሀይ ምናድል ለዐለት ወህበት ተ። ክሉ ወቀይነ ህዩ ዲብ ጽልመት እንሰርግላ። እብ ላሊ ንትለበስ ከዳይነ እንሰርግል ለዐልነ እቱ ዘበንቱ። ሄራር እብ ላሊ ህዩ መለሀይ ምናድል ቱ ለዐለ። አይወ ሄራር እብ ላሊ

ሰበር ቀጠ እንዲ አሐልፍለ መሓባር ዜሮ ብሌቃት ክምሰል በጽሐነ መኪነትን እብ አዩ እትጀህ እግል ትሄርር ክምቱ ዲብ ንታኬ። እግል አሰክ ነቅፈ ወበርከ ለትነሰእ ገበይ ዜሮ ድገለብ እንዲ አትሌተ ሕሊል ብሌቃት እብ ረከሱ እንዲ ደነቱ። እብ ሐርመት ግርይቶ

ዲብ ጨቢብ ወደግ ወሐቀሁ ዲብ ፋዬሕ ጋድም ክምሰል ትከሬነ። ላተ ለልትቀራቀብ ዐለ መካይን ዲብ ፋዬሕ ጋድም ክም ምራዱ እግል ልትፈቱት አሰተብደ። ሕነ ረከሰለ ሰናዱቅ አልቃም ርጁም ለዐለ ሰናዱቅ እንዲ ገብአነ እግል ትትፊተት ለዐለት ኦራል እግል እብ ጸሓይ ወሬሕ ባርህ ለዐለ ባዶብ ዲብ ነዕፌ ወእበ ምን ክትረ መትገምባይ መኪነትን ልሄሬነ ለዐለ ሽማል ርይሓም ዲብ ሕነ ድማን ወድገለብ ዲብ ነኣትቃምት ቱ አሰክ እምሀሚሚ ንትገምቤ ለዐልነ። እሊ ወክድ እሊቱ እግል ድገለብነ ለዐለ ዐክር ክምሰል ከረ ተበት ሰላም ወምንኬኑ ለህለ ምን ሕሊል አልጌነ አሰክለ ውቁል ደብር ከግር ለልትመደድ

አድብር ግላኒታት ዲብ አቀምት ለቀደም መደውሻሽ ናይ ዲብ ቅብለት ሳሕል ሻፍፍ ለዐለ እብ ውቃው እዝ ለልትአመር ጄሽ አባይ ለዐለ ወክድ ንዳል ትካየለ እዩ።

እብ ፍንቱይ ዲብ ፊቃዶ ግረ እንዲ አቅበልኮ ዲብ ኢያመ ህጁም ለዐቢ ቅብለት ሳሕል አቅበልኮ። ለወክድ ለህይ ክእነ ክም ዮም ምን ደብዐት እት ረከሰ መካይን እንዲ ኢኢገብእ ዲብ ፈርወንተር ናይ ህጁም ፈሰለትን ምንለ ምን መደት ሳድሰ ወራር እንዲ አሰተብዳት ሻፊት እቱ ለዐለ እት ገረግር አሰመረ ለዐለ መዐስከረ ዲብ ሰለስ እንዲ ትከፈለት ሰረ እብ ምግብ እብ ሕሊል አልጌነ። ሰረ እብ ድማን እብ ጀህት ፈሕ ወእነ ለዐልኮ እት መጅሙዐት እብ ድገለብ እብ ሽግለት ዲብ ህጁም

ቀደም ድፍዓትነ ለህለ አልቃም አባይ ክምሰልሁመ አልቃምን እግል ነአፍግር እት መዳሊት ውዕላም እት ለዐልነ አምዕል ትቅብ ትቤ እቹ። እብ ክእነ ዲብ ሕናቱ ህዩ ባካት ሳዐት ሐቱ ናይለ አምዕል ዲብለ ውቁል ዐክል ዱሉይ ለዐለ መዳፊዕ ጄሽ ሽዕቢ ክሉ ምስል እግል ልንቀም ክምሰል አሰተብደ ክሉ እግል ህጁም ዱሉይ ለዐለ ጄሽን ዕውር ሕደግ ወሐንኪሽ እት ልብል ገዱ ቀደም አሰክለ ምን ቃብል ዲብ ለአኖክዩ ዝያድ ሐምሰ ሰነት ለወደ ጋድሞታት ትባደረ። ሕናመ ምነውዕላም እቱ ለዐልነ ወደግ አሰክ እንክር ዔለጸዕደ አላየምነ። ክሉ ክምሰል ፊራሮ ዲብ ህዳይ ብድረ አሰክለ አባይ ሻፍፍ እቱ ለዐለ ድፍዓት ገብአ። እብሊ ህዩ ለዲብ ቅብለት ሳሕል ሻፍፍ ለዐለ ጄሽ አባይ ምነ ምን ዮም 19 አሰክ 22 ማርሰ ለገብእ ሰርጉል ህጁም ቅብለት ሳሕል ተሐረረት ወውቃው እዝ ህዩ ደውሸሸ። ምነ ወክድ ለህይ ወሐር አሰክ እሊ አምዕል እሊ ቅብለት ሳሕል ምን ጄሽ አባይ ሕር ለዐለ እቱ ወክድ ቱ። እት ክእነ ቴለልቱ ህዩ ሐቀ ሰነት ወሰሶ ወሬሕ ምን ደብዐት እንዲ ትበገሰነ ጋድም አልጌነ ለትከሬነ።

ጋድም አልጌነ ዝያደት ፋዬሕ ወእግል ትሄርር እቱ ለለአትናይት ቱ። መካይነ ዲብ በራር ጋድም ክምሰል አራባት ደርብ ሕድ ዲብ ለአራብድ እብነ እምሀሚሚ መጣግሕ። አውገት እንዲ ሐለፍነ አሰክ በሐር ገጽነ ክምሰል አጭሮረግነ ላተ ማርሰ ቴልካይ አማም ክምሰል ህሌነ ሽክ ኢወዳነ። እትሊ ወክድ እሊ ዲብ ማርሰ ተክላይ ሐቱ ምን ሰለስ ደበባት ለትትከወን ውሕደት ክቡድ ሰለሕ ዲደማን በሐር እንዲ ገብአት ዕስክርት እት ዐለት።

ለፈሰለት መብዘሐ በሐር ርኢ ሰበት ኢለአምር። በሐር ንሐሰ እበ ወኒዚድ ዲብ እምብልቱ እግል መርኢተ ንትረመጭ ለዐልነ። ሐቀ ሰር ላሊቱ ህዩ ዲብ ማርሰ ተክላይ ጠበሽ ለእምቤ። ምድር ልሰዕ ጽልመት ሰበት ዐለ ዲብ ዐልነ እት አካን እግል ንትመዩ ቀረርነ። ዲደማን እንዲ አፍገርነ ህዩ አሰክ ጽብሕ ምድር መካርርነ በጽሐነ። ምነ ክምሰል መክልከሎት እብ አድብር ለትከለለ ድዋራት ደብዐት ዲብ ደብር ወዕንክለት ለኢትርኤ እቱ ጋድም በራር ክምሰል በጽሐነ ኤራትርዩ ለግሩም መካራተ ዐጅቤነ። ኤራትርዩ ምድር ዐክል ወአድብር። ምድር ጋድሞታት ወበሐር ክምተ ሽክ ኢወዳነ። ለድቁብ ምዋጅ በሐር ህዩ ዝያደት ክርንቱ ላሊ ሰበት ደምቅ ክለ ለላሊ ህንዲዶ ዲብ ልብል አክለ አተንሴናሁ ምድር ኦጊድ እንዲ ጽብሐ ለበሐር እብ ዕንታትን እግል ንዕፈዩ ወበክት ረከብነ ምንገብእመ እግል ነሐምስ እት ተምኔነ።



ሰህጻናት፡ ከልሹም መሐመድ

ምን አስመረ እት መሳፈት 15 ኪሎሜትር ለሀላ ድን - በለዝ ዲቡ ትነብር። ምን ዐድ ሐረስታይ ትወለደት ወምስል ሐርስ ዐቤት ወእት ህዳይ በጽሐት። ክም ተህዳትመ እናስ ሐርስ ለፈቱ ምን ገብኦ፡ መንበረቶም እብ ተማመ ምን ሐርስ ተ። ህተ እም ዕያል ሰበት ተ፡ ዋልዳይት እግል ዕያላ ለትወደዮ ምን ሐቱ እንዴ ኢተኣነቅስ ሐርስ ዐማር ሐሊብ ናይ ዐደ ሰኒ ተኣሸቅዮ ወተኣትመቃርሐ። ክሉ ለእሉ ራፍዐት ህሉት መዝ ክል ምኖም እብ ተኣስትህል እንዴ ፈሀመቱ ዎሮኽ እብ ገበዩ ክም ገይሰ ትወዴ። ምን በሕ እንዴ ትበገስት ዲብ እል ባጽሐተ ለህሉት ደረጀት ዐማር ሐሊብ እግል ትብጸሕ ሰዳይት ወኣትናያት ብእስ እንዴ ኢልትፈንተዩ ጸገም ትሩድ ትጸገመት። ክም መሰል ሰኔት ለልኣስምዮ ለልትረኤ ፍሬ እግል ተኣርኤ ህዬ ቀድረት። ጃርዲን ብእሳመ ዓማት ዐለፍ አክደር እግል ናይ ሕልብ ሓህ ምን ገብኦ፡ እትሊ ሸቅል እሊመ እዴህ ተሓብር።

እበ እል አርኤት በቃዐት ምህነት ወለረክበተ ፍገሪት እተ ሐልፈ ወጠንያይ ወዕለ ሐሊብ ወፈርያቱ ጃእክት ምን ተህየበው መሰል ሰኔት ላቶም ሚልክት ሐርስ ዐማር ሐሊብ ወፈርያቱ ሐቱ ገብኦት። ለኣስክ እል ማልክተ ህሉት ምህነት ሕድት ክምተ እንዴ አምነት ህዬ፡ ለህሉት እል ሩእየት ቁሪት እግል ትብጸሕ እምበል አትኣራም ወሕላሌ ትሸቁ ህሉት አሰይደ ትዕግስቲ ህንጹ።

አሰይደ ትዕግስቲ፡ “ዐጄ ሐረስቶት ሰበት ቶም እት ሀረም፡ ከሰነሱ አውዐሉት ንዋይ ወብዕድ አሸቃል እት እትበገስ ዐቤት። ሰበት እል ሸቀ ዲብ ዐማር ሐርስ እግልዬ ክቡድ ኢኮን” እት ትብል ዕቢያተ እል አዜ ጸብጠተ ለህሉት ገበይ እበ እግል ተኣሰርር ክም ሰዴተ ተሓኪ።

በክተ እንዴ ሰነ ህዬ ጸዋህመ ሐረስታይ ሌጠ እንዴ ኢገብኦ፡ መኣሰሰት ሐርስ እግል ለዐምር ለፈቱ። ከእለ ረቅቦት ክልኢቶም እተ ዲበ ብጉሳም ህለው ዐማር

ሐርስ ወሐሊብ ናቅሰት ሕድ እት ለኣታም እግል ልትናበሮ ደማነት ገኣት እሎም።

እት ሰነት 2005፡ ሐቱ ወኣት ሐሊብ ሌጠ እንዴ ተወበት፡ ሐ ብዝሕት እግል ተህሌ እል ክምቱ እንዴ አምነት ትበገስት። “ሰልፍ እግል ኖሰነ ምንሕት ለትገብእ እልነ ሐቱ ወኣት ትዛቤ። እል ወኣት እል ሐሊበ ቅዙር ሰበት ዐለ እግል ዓይለትነ ለከፊ ሐሊብ፡ ርግኦ ወሐሳሰ ሀበተ። ለወለተ አክለ ክም በጽሐት ህዬ ክምለ ናይ እመ ቅዙር ሓሊበ ገብኦት እግል። ምን ክልኢተን ለእንረክቡ ሐሊብ ህዬ እግልነ እንዴ ከፈ እተ አግዋርነ ለሀላ ዓይላት እግል ነኣዝቤ ምኑ አንበትነ” ትብል። ለእብ ሐቱ ወኣት ትበገስት አሰይደ ትዕግስቲ፡ ዮም 20 ረኣሰ ምን አሐ ሐሊብ ትውብት ህሉት፡ ምን ክል ወኣት አዬ ዲብ አምዕል አሰክ 15 ሊቲሮ ሐሊብ እግል ትሕለብ ቃድረት ህሉት።

ዲብ እል ወክድ ጎነ እግል ዐማር ንዋይ እብ ዓመት ወሐ ሐሊብ እብ ፍንቱይ ሓግዝ ለሀላ ዐለፍ ንዋይ ቱ። ሕዳን ዐለፍ ሀላ። እል ሐል እግል ልትረከብ እሉ ውዛረት ሐርስ እብ ትሉልይ አትፋዝየት አፍሪዮት አክደር ዐለፍ ንዋይ ተኣትናይት ህሉት። ተጅርበት ዐማር ጃርዲን ለጸንሐ እል ዓይለት ትዕግስቲ ህንጹ፡ አፍሪዮት ዐለፍ አክደርመ ሕሰር ዛይድ እንዴ ሀበቱ ትሸቁ። ብእስ አሰይድ ምክኤል ዘርእሚካኤል ምነ ጃርዲን ሐድ ርቦ ሄክታር ለትገብእ ኣካን እግል ዐለፍ አክደር ይመመ ሰበት ጸንሐ፡ ለጼዋይቱ ተኣትመቃርሐ መኣሰሰት ዐማር ሐሊብ ሸበህ ደማን እግል ትርከብ ቀድረት። እትላ እግል ዐለፍ ለፈንተዩ ገበነ ብርሲም(አልፈ-አልፈ)፡ ዕፉን ወእሉ መሰል ዐለፍ አክደር እብ ትሉሉይ ልትወጪድ ምነ። እብ ፈድሉ ህዬ፡ እል ዐማር ሐሊብ ፈርያተ እንዴ ወጀበ ተኣተላሌ ህሉት። ህተ ወብእስ እል ዳይ እል እብ ጅድዮት ምን አተላለው አሓሆም ወጂቦት ገኣት እሎም። ዝያድ ህዬ ደማነት ዓማት ማይ ጽሩይ ሰበት ረክበው፡ ሰነት እብ ግዲደ ምን መሕገዝ

ማይ ኢሊህ’ሞ።

ወጂቦት ጅንስ ሐ ወምን ኢልትቀደር እብ ደፍኢትክ ለነዕዩት ሓክ አትሓያስ እት ውጅብ ዐማር ሐሊብ ተረት ዐባይ ብእቱ። ሰበት እል መትነፊዕ በሰር አዳቃል ሐ (Artificial Insemination)፡ እት ረኣሰለ ምን እብ ጅመዕ ለለዐዴ ሕማማት አድሐኖቱ፡ እትሊ መጃል እሊመ አህምየቱ ዐባይ ተ።

ሐረስቶት ምስል ከሰሶም ሰብ ምህነት እት ልትፋህዎ ወእሶም ዲብ ልትወጅሆ ዶል ልትነፍዑ እብ ህዬኒ ለልኣደሚዕ ወቀይ ገብኦ። እግልሚ፡ ወኣት ሐሊብ ሌጠ ኢኮን ለትህይብ፡ እል ትመስልመ ትፈሬ። ሐቀ ተውብ ህሉክ፡ ወለት ወኣትክ ቅዙር ሐሊብ ሌጠ እንዴ ኢትገብኦ። ምን ናይ እመ ለበዜሕ ዕመር ለቡ ወሕማም እግል ትክህል ለትቀድር፡ ዶል ትገብእ እክ ርዝቅ ዐቢቱ። አሰይደ ትዕግስቲመ እል ናይ በሰር አዳቃል እብ ፈሀም ወፈዛዐት እት



MS. TIGISTI HINTSA DAIRY FARMER

መዓሉ ክም ተኣውዕሎ ተሐብር። “ናይ በሰር አትዳቃል ሐ (Artificial Insemination)፡ ሌጣቱ ለንትነፊዕ ወፍገሪቱ ሰኔት እት እንተ ረከብናህ” ትብል ህተ።

ከወኖት መኣሰሰት ሐርስ ምህነት ዐባይተ። ሰርዐት መንበሮ ሌጠ ኢኮን። ከሐረስቶት ዲብ እል እግል ልትወደቶ ገኣው ምንገብኦ። ዲብ ሰኒ ጃዋንብ ሐርስ አሶይ-ነበርይ እት ለሓፍቱ እት መኣሰሰቶም ንዛም ወኣብሳር ሐዲስ እት ለኣሰብቆ እግል ሊጊሶ ሐቀ ኢቀድረው፡ ለካድሞም ትሩድመ ልግበኦ። ፍገሪት ሸቅሎም ለተኣተግኔዕ እግል ትግበእ ኢትቀድር። ከእቡቱ ዶር ሰብ ምህነት ሐርስ ምህም ለገብኦ። “ውዛረት ሐርስ እትላ ብጉሳም እል ለህሌነ ንኢሸ መኣሰሰት ሐርስ ፈርያት ሐሊብ ዶር ዐቢ አግዴት። ሰብ ምህነት ሐርስ እት መጽኦ ዓፍየት ንዋይነ ታብዖ ወለትነፊዕ’ነ ነሲሐት



ለሀይቡኹ። ፈድል ሰዳይቶም ህዬ እትላ ባጽሓመ ለህሌነ ደረጀት በጽሐኩ” እት ትብል እግል ምስል ምን ቅሩብ ለሸቁ ሰብ ምህነት ሐምዴ ዛይደት ትቅድም እቶም። ምስል አሰይደ ትዕግስቲ ምን ቅሩብ ለትሸቁ በዐል-ምህነት ሐምሌ ወፍሬታት አሰይደ አክበረት ፍሰሃጽኖን ክእነ ትብል፡ “ኣነ እግል ትዕግስቲ ክም መሰል ሰኔት ዲብ መኣሰሰት ሐሊብ

ውብዕድ ዐዋምል ለልትጸበሞ ብዙሕ እግል ልትወደዉ ለሶም አሰቡር ቱ ለልትቃብ’ሎም። እብ ፍንቱይ ዲብ አከይ ሰነት ወሕዳን ዝላም ለመጽእ እቱ አውካድ፡ ሕዳን ዐለፍ ወክሳር ንዋይ ብዕደት ብዙሕ ምነ መሐልክ ለገብእ እቶም መሓግዝ ቱ። እግልሚ፡ ዐለፍ አክደር ሌጠ ዲብ ተኣፈሬ ዓመት እግል ትፍገር ኢልትቀደር። ክሉ እል አሰቡር እንዴ ትትዐዴ ቀደም ተኣነጽር ለህሉት አሰይደ ትዕግስቲ፡ እል እል ማልክት ለህሉት መኣሰሰት ፈርያት ሐሊብ እት መንበረት ዕያላ ሚ ተቅደር ክም አምጸአት ትሸፊሕ ዲብ ህሉት፡ “ተቅደር ሰኒ አምጸኢኩ፡ በርከት እል ሐ እዴ ጸርነ እንዴ ኢነኣተቅብል መንበረትነ ሰኒ እንመረሐ ህሉክ፡ አጀኒትነ እብ ተኣስትህል ነኣደርሱ፡ ቤት ሰከን አንደቅኩ፡ ሐሊብ ለነኣትባጼሕ እበ መኪነት ወለለኣትሐዜነ አግርበት ቤት ተውበኹ። እል ሓነ ክሉ ለልትሐዜ ተኣሊፍ ዳብኣት እነ ህሉት” ትብል።

አሰይደ ትዕግስቲ ሩእየተ ሚተ፡ ወናይ መሰተቅበል በርናመጀ ሚቱ። እል በሊስ ለልሐዜ ለኢተርፍ ሰኣልቱ። በሊስ ህዬ ክእናቱ፡ “ ናይ ምስተቅበል በርናመጀዬ፡ እት ሐሊብ ቂመት እት ኑዕዩቱ እንዴ ወሰክኩ፡ ሐሳሱ ውጪር (ርግኦ)፡ ውብዕድ ፈርያት ሐሊብ እንዴ ሰነዐቱ፡ ሰልፍ ዲብ ዕዳገ ዐጄ እግል አዝቤ ወሐቀሁ ዲብ ዕዳጋታት ካርጅ ለእትዐዴ እተ ደረጀት እግል እብጸሕ መትጸጋም ቱ።” እምበል መትሐላል ከደምክ ምን ገብኦ፡ ዛህር ለኢገብእ ሕልም ሰበት ኢሀሉ፡ ለሰእየተ እብ ዐመል እግል ትብጸሐ አናመ በዐል ሰእየት አነ።

እብ መባደረት ኖሰ አሰክ አዜ ካሰተተ ለህሉት ገበይ እግል አዋልድ አንሳት እብ ዐመል ለትትረኤ መሰል ሰኔት ጋብኣት ህሉት። ዐማር ሐሊብ ወፈርያቱ፡ ውላድ ተብዕን ሌጠ ለልአወቁ ዲቡ መጃል ክም ኢኮን ህዬ እርኢተን ህሉት። ህታመ፡ እትሊ መጃል እል ለልትሐሰረ ወረቅብቱ ለህሉት እለን አንሳት ደርበ እግል ልትከሰኣ ዲቡ ትትፋኸን።



እብ ውዛረት ሐርስ ለልኣሌ ዓመድ

ዶ/ር ዑመር ዑሰማን

ሲያሱት ለትብል መጃል አሮ ምነ ዋሴዕ ወድድ ሕድ ላቱ ተርጀማት ለበን ከሊማት ተ። ገሌ ምን ተርጀማት ምን እንረኤ ከም ከረ። ሲያሱት እት ፍንጌ አንፋር ሽዑብ ለህለ ዕላቃት። ወእት ሐቲ ፍክር እንዴ አብጸሕክ እግል ትሕከም ለለአቀድር ተ። ሲያሱት ምስል ሕክም ሐቲ ደውለት አው አቅሊም ትትጸበ። እት ረክሰ ለገብክ መጃል ለህለ እክ ረክይመ ሲያሱት ተ። ምጅተምዓት አው ድወል ለልትሐከመ ወልትሐረክ እብ ገበይ ርእየት ሲያሱት ተ። ወብዕድ ለልብል ለፈትናተ ፍክር እንረክብ።

ሲያሱት ምር ቅስም ምን ዕሉም እጅትማ። እት ገበእ። እት ሐያት አንፋር። ሽዑብ ወድወል ተረት ዐባይ ለበ ተ። እግል መስል ከም ምዋጥን እት ረክሰ እት ወጠንክ ልግባእ መድወል እድንዩ ለነሰኣሁ ቀራራት ረክይ ዶል ለሀሌ እከ። አው ምስል ፍክር ገሌ ክፋል ምጅተማዕ ዶል ትዋፍቅ። ልትፈሀመክ ወኢልትፈሀመክ እብል ኢከሰስ እት ሲያሱት ኣቲ ህሌከ።

ሰበት እሊ ኣነ ሲያሱት ይእፈቱ ወብዕድ ለልብል አራእ እግል ነፍሰክ ቃሻሽ ወቁሪን ለለአለቡ ምን ኢገብእ። ምን ሲያሱት ወተእሲረ ለተርፍ ነፈር ኢህለ። እግል መስል። ሲያሱት እት ፍንጌ ገባይል ልህለ ዕላቃት ገበይ



አሳይድ ወደኣብ ወልደግርግ


አምር ሲያሱት ምስል ዕላቃት ሽዑብ ወሕክም ድወል ለልትጸበ። ሰበት ገኡ ለገኡት ለተሐክም ሕክመት ምን ገብእ። ወምህም አሳስ ዕላቃት ገባይል ሽባብ ቶም። እት ለሐልፈ ሰረን አርበዓታት። ሕምሳታት ወሰሳታት ለዐለው ሽባን እርትርዩ። ሲያሱት ክፋል ምን ሐያቶም ከምተ። እንዴ ሰከው ለኢፈግሮ ምነ ከምተ ወርሐም። ዓኢለቶም። ወምን ለዐል ክሉ ወጠኖም ከም ተንክፍ ሰበት ፈሀመው። ምህርቶም እንዴ ሰደው እት ነዘ። ሽዑብ መጋብህት እስትዕማር። ጠወሮት ነፍሶም ወዕላቃት ሽዑብም እቲ እንዴ

ሽባብ ወሲያሱት

ዐድነ ተኣሪክ ሽባብ ተ። ታሪክ ህዩ ሲያሲያይ ፍክር ተ ለለአመጽኡ። ከክም ሽባብ እት ክሉ መጃላት ወጠነ ንሻርክ ወንክደም።

አጅያል እርትርዩ ተኣሪክ ለሐልፈው ቀዳምያም ለትሰበለ እቶም መስል። እሊ ህዩ እብ አፋክ ሌፍ እንዴ ትቤ ሌጠ ለመጽእ እንዴ ኢገብእ። እብ ደም። ተዐብ ወካድም ትፋድ ለልትረከብ ደሀብ ላቱ ነባሪ ሲያሱት ተ። እሊ ነባሪ እሊ ለመልክ ሽባብ እርትርዩ እግል ወራራት ወያነ (1998-2000) አፍሽለው ወግራሁ ለዐሉ። ተሐድያት ሲያሱት። እቅትሳድ። ሕሰርም ወናይ ለሐልፈየ ክልኤ ሰለሰ ሰነት ህንግጣጦም እንዴ አፍሽለ እግል ወጠኑ ምን ለዐል ክሉ ዋዲህ ልትረከብ። እሊ ህዩ ተኣሪክ ዐዱ ወገቢሉ አህምየት ለለህይብ። መግጥር ለቡ። ሲያሱት ለልፍህም። መቅደረት ወሲያደት ወጠን ምንለዐል ክሉ ለወዴ ሽባብ ምን ትረብ ተ።

አዜመ እርትርዩ ገጽ ቀደም እግል ተኣሳድር። ሽባብ የም ተሪክ ዘበን ቅዱም ወኣዜ ንድረሱ ንሰጅሉ። እት ዕልም ፍዳእ። በሐር። ምድር። መዓድን ወብዕድ እምበል ህት ለህበትን እግል ንክዴ ለአስትህል። አጅል ባርህ ምስተቅበልኑ ወለመጽኦ



ፔክ እብራሂም ሰልማን

ከምተ እግል ትውዳሕ እናቲ።

ዕልም እብ ቀሊል ኢልትረከብ። እዘም ምኑ ምን ረውደት አስክ ጃምዓት እብ ለሀ ለለአደርስ ገቢል ወሕኩመቱ። ሐቲ ሐርፍ ለአድረሱ ነፈርመ እግል ተሐሽመው ወእት ረክሰክ ትርፍዑ ለአስትህል። እሊ በክት እሊ አክል አይ ቃሊ ከምቱ እግል እንዴ ደፈዐው ለደርሰው አንፋር ዶል ትረክብ ተ ለተአምሩ።

ድራሰት ህዩ እግል ነፍሰክ ወግሩሽ ተኣቲ ኢኮን ለደርሰ። ድራሰት ገቢልክ ምንላ ህለየ ደረጃት ዐቦት ወመንበረት ገጽ ቀደም ተኣብል ተ ለትደርሰ። ዕልም ለተአበርህ ሽምዐት ተ። ለተአበርህ ሽመዐት ህዩ። እብ ድዋን እግል ትደባእ ኢለአስትህል። እግልሚ እት ድዋን ለኣቲት ሽምዐት ኢተአበርህ ወእግል ግልብብተ ለህለት ድዋን ትግባእ መብዕድ ሓጃት ተኣነድድ።

ክትብ ታሪክ እትለ ትቃሌዕ እቲ ወቅት እሊ እድንዩ ክል ዶል። ዕልም። ምህነት። ፈሀም ወቅወት ለመልክ ገቢል ሌጠ ከም ነብረ እግል ትፍህም ክቡድ ኢኮን። ደሐን ኢትድረሰ ወካድም ኢለአትሐዜክ ራድኢት እግል ነሀበክ ተ። እብ ፍክርክ ኢቲጊሱ። ሕነ ለአፍገርህ ቃኑን ተባዕ። ዴሽ

ወቅወት ኢለአትሐዜክ። እት ዐዳለት ሌጠ እመን ለልብል ፍክር። አግቡይ አስክ ሐዲስ እስትዕማር ሌጠ ተ። ገቢል ርሐብ ኢኮን ምር ነፈርመ እግሉ ለተሐይሰ ኖሱ ተ ለለአምረ።

ከክም ሽባብ እሊ እት ለዐል ለሰሚናሁ መጃላት እብ ራታዐት። ወዳሐት ወርእየት ፋይሐት ንፍህመ። እብል ህሌት እነ መቅደረት እት ሲያሱት ንትአየሱ። ታሪክ ዐድነ ንቃሌዕ መርበይ መስተቅበልኑ እግል ልብረህ። ሰበቡ እኩብ አምር ወፈዛዐት ሽዑብ ወወጠን እብ ከምክምት መቅደረት ናይለ ካድማይ ክፈል ምጅተማዕ ላቱ ሻብ ተ ለልትሽረሕ። ለረከብናህ ምህነት ምን ገብእ ወዕልም እብ ከኣፎ እት መስለሐት ወጠነ ነአውዕለ እት ኢኮን። እት ኢፋሎታይ ፍክርያት ወቅትን ኢነኣብዴ።

ናይ የም ሽባብ ናይ ፈጅር መስኡሊን ወሚርሐት ቶም። እሊ አምር ጠቢዒ ተ። ናይ የም ውላድ ናይ ፈጅር አብ ወናይ የም ደረሳይ ናይ ፈጅር ምደረሰ ተ። እሊ እብ ክእነ ሓለት ለትሄርር እድንዩ። ምስተቅበል ለመጽእ አጅያል እርትርዩ እግል ልሰኤ። እርትርዩ እንዴ ሐጠት እግል ትብጠር ወተኣሳድር። ሽባብ የም ናይ ሲያሱት አምርን ሊዚድ ወርእየትን እግል ትፍየሕ ወጅብ።

ዓዳት። ዕልም። ርእየት። ምህነት። ሐጠር። መግጥር ወብዕድ ምስል ሲያሱት ትፋድ መትጸባጥ ቡ። እሉም እት ለሐልፈት ታመት ሕሰበት ለሰሚናህም ሓጃት ኢነፍያ አው ኢለአትሐዜክ እግል ሊበል ለቀድር ነፈር ኢህለ። ህቶም ሐቆ ለአትሐዜክ ገአው ህዩ። ሲያሱት ተኣትሐዜክ። ነፍሰክ። ዓኢለትን ወምለዐል ክሉ እሊ እብ ደም አላፍ ሽሁዳነ ለመጽኣት እርትርዩ ገጽ ቀደም እግል ትሄርር። ሲያሱት ካልኣይ ክፋል ሐያት ሽባብ ከምቱ እንዴ ፈሀም። ራቱዕ ፍክር ሲያሱት። አስክ ካድም ወዐማር ለነሰእ ንትመወን።



ተኣጽብ። ወትመሬሕ። ሕናመ ክፋል ገቢልን ሰበት ገኡን ላዘምቱ እግል ተኣሲር ልውዴ እት።

ብዕድመ ሲያሱት ምስል ወጠንዩት። ተኣሪክ ድወል። ብንዩት ወዐማር ድወል ወብዕድ ለልትጸበ። ሰበት ገብኡት። ነፍሰክ። ዓኢለትን። አቅሊም። ወጠክ። ለእነብር እተ ቃረት ወእድንዩ ገጽ ቀደም እግል ሊበል። አሆታይ ፍክር ሲያሱት እግል ለህሌ እክ። ወእግል መትቀዳም ገጽ ቀደም ነኣብል። እት ሲያሱት ከም ሽባብ እብ ለትወቀለት ገበይ ንሻርክ ለአትሐዜክ። እግልሚ ምን እንብል ተጠውር ወመትቀዳም ምስል ከምኩም ፍክር ወርእየት አንፋር ሽዑብ ተ ለልትጸበ።

ከመ እት ለዐል ለሽረሕናሁ።

ትበገሰው። እኪት ወመራር እንዴ ከህለው ሐቆ ሰኖታት ሰውረት እግል ለአትብግሱ ወእግል ወጠኖም እርትርዩ ባነ ሕርየት ለአርኡ ቀድረው።

ላመ ግራሆም ተለው ሽባን። ሚ ከሰነ ወነፍሰነ እግልሚ እት ከጠር እንከሬ እንዴ ኢልብሉ ወጠዐም እድንዩ ኢልትረክዮም። አሰር ሐምም እንዴ ነሰአው ለሐምም አትበገሰው ንዳል። ብዙሕ መሕለኪት ወዋይዲባት ድወል እድንዩ እንዴ ከህለው እግል ሽዑብ ሕርየት ሐረበው። ሕሰብ ነኣብል ሐቲ ዶል። እሉም ሽባብ እት ሲያሱት ኢነኣቲ ምን ልብሉ። እግል ርሐም ወነግፈው ገብእ። ምስተቅበል ዐድነ ህዩ ሚ ወገብእ። ከምን እሉም ለእንርእየ ምን ተህሌ። ታሪክ

አጅያል። ደማንት ለትመሳዌት ነብረ። እብ ሕነ ለእንወድዩ ካድም ዘራዐት ተ ለትመጽእ እት ኢኮን። እት ክትብ ወወሳእል እዕላም አዳም ካፍየት ወለትመሳዌት ነብረ እግል ልብለዕ ብእቱ ሰበት እንቤ እግል ልትመም ኢኮን። እት ፍንጌ ካድም ወረኣይ ህዩብ ዐቢ ፈርግ ህለ።

እት ክሉ እሊ እት ለዐል ለሰሚናሁ መጃላት ዕልም መቅደረት ለጠወረት እርትርዩ። ናይ ምህነት አፍረዮት ወተክነሉጂ ቅድረት ሰበት ትትወቀል። መሻክል ወጠነ እት ባልሐት። ተረቱ ዐባይ ተ። በደል ከም እሊ ነቅሰ ወእለ ኢህሌት እንብል ክልነ ሽባብ አግቡይ ሰለሐት ወአሰነዮት እሊ መሻክል ዶል ነሐሰብ። ገበይ አስክ ዐቦት ቀላል

ሰበብ ኢመትዐዋት እት ከበዝሐው ክንፋር

- እመር መባዴሕ እንዴ አለብክ ሐያትክ እግል ትምረሕ ጀረቦት።
- ለሳደፊክ መሻክል እንዴ ኢትባሌሕ እት ብዕድ መሻክል አቲ።
- አጅትማዕደትክ ወዕላቃትክ እት ምጅተመዕ ድህርት ሐቆ ገብኡት።
- ለከፊ ናይ አካዳሚ ደርሰ ኢረኪብ ወረታዐትክ እት ተአምር ጎማት ኢበቲክ።
- ነፍሰክ ኢመሊክ ወእት ለኢነፊዕ ሽቅል መትፈራር።
- ሰምዒትክ ኢከፊዕ። ንሳልክ ኢመሊክ። ወምለዐል ክሉ ሰአየት ኢህለዮት።
- እብ ሰበብ እኩይ ሕሳብ ወድህር መነት ዓፍየትክ አንቀሶት።
- ህርኩት ኢግብኡት ወለኣንበትኣህ እት መባጽሐ የኣብጽሐት።
- እብ ሕግላን። ሕማም ወመትፈንታይ ምን ፈታይ ጨቅት ህለዮት። ሕርየት ኢረኪብ ወምት ፍርህት።
- ሽሪክ ሐያትክ እት ሕርየት መትጌጋይ አውመ መረ ድጉግ ግብኡት አውመ ምን ዐደድ ወለዐል ኢመትሓፋዝ።
- ወቅትክ ወግሩሽ እብ ግምሽ አብደዮት ወራቱዕ ሽቅልክ እት ኣመሮት መትጌጋይ።
- ኢከህሎት አውመ ጤርዓይ ወይእመን ግብኡት።
- ኣነ ለእቢል ትግበእ ብሂል ወእኪት እብ እኪት እግል ትፍዴ መትብጋሱ።
- ኢመትሓፋል እግል እቲ ትበገሰክ ጋር። ከሓይሳም ቁርኣት። እሉም ገሌ ምን አሰባብ ፈሽል ቶም። ምኖም እንዴ ተሓፈዘክ ህዩ እብ ዋጅብ ሐያትክ እግል ንምረሕ ወጅብ።

ህዝባዊ ህክክዳኑ ህክክፍጅ



ዎሮት ዶክተር እት ልሰዔ ዲብ መስተሸፈ ክምሰል በጽሐ እብ ሸፋግ ልባሰ ሸቅሉ እንዲ ለብሰ ዲብ አፍ ቅርፊት ዐመልየት ክምሰል በጽሐ ዎሮት እናስ ዐቢ እት ቀሴ ጸንሐዩ። ለእናስ እግለ ዶክተር ክምሰል ረኣ፤ “ሰምዐኒ ዶክተር፡ እሊ ክሉ ተለፎናት እት ወዱ እትከ እግልሚ ተኣከርከ? ሕነ እግልከ ንትጸበትር ወእንተ ትብዔ? ወልዩ ቅሩብ ሞት ህለ፤ እብ ሸፋግ ዐመልየት ኢወዴክ እግሉ ምን ትገብእ እግል ሊሙት ቲ።”

“ደሐን ቲ፡ ኦብሸርከ ለትትቀደረኒ እግል ንውዴ ቲ። ኢትትቅቀልል፡ ምሽክለት ይህሌት።”

“ምሽክለት ይህሌት ትብለኒ! ወልዩ አርወሐቲ ትሴንግ ህሌት። እብ ሰብብ መተኣከርከ ሞተ ምን ገብእ፡

ወጀምሪኡም፡ ወልዩ ላኪን ሰበት ኢትከሰስከ እብ ቲ፡ አክል እሊ ለተኣከርከ ምኡ።”

“ደሐን ቲ፡ ረቢ ሰዴኑ ኤማን እንዲ ወዴክ ትጸበረኒ በሰ፡ አክል ኢል ኢትሕረቅ።”

ሐቆ እሊ ለሐኪም እግለ እናስ እንዲ ሐድገዩ ዲብ ቅርፊት ዐመልየት አተ ወእግለ ሕሙም ዐመልየት አንበተ እግሉ።

ለእናስ እት ልትሐራገም ወልትራገም ዲብ አፍ ቅርፊት ዐመልየት ልትጸበር አምሰ። ለዐመልየት ወቅት ረዩም ነሰኣት። ለእናስ እብ መሻቀለት አርወሐቲ ፈግረት። ክል-ዶል እግለ ቅርፊት ከራኬሕ፡ ልትዋለብ ወዕንታኡ እብ ብካይ ጀመም ለአብል።

እግል ነኣቲካ ቲ። ሐቲ ምሽክለት አለብ፡ ለዐመልየት ቀላል ዐለት። እሊ ሐኪም እሊ ህዩ ሰርጉል ቲ።

“እግልሚ ለዐመልየት ነጅሐት እንዲ ቤለ ይኣሰኣሌኒ?”

“አላህ! ይኣመርከ ይብ፤ ወልዱ ማሌ ሓድስ እንዲ ጀረ ዲብ ዲብ ዕደደት ብዕደት ዐለ፤ መረ እዙይ ሰበት ዐለ እት ረኣሱ ዐለ፤ እግሉ እት ለዐቀብ ትላኬናሁ። አዜ ህዩ እት ግራሁ ሞተ። ምን ወልዱ እንዲ አዝመ እግል ወልከ አድሐኩ። ምን እሊ ወኪን ወፊእ ወረሕመት ዲብ አየ ህለ።” ቲለቲ።

ለእናስ እብ ከበር ድንገጽ እት እንቲ፤ “እናልላሂ ወእናኢለይሂ ራጅዑን! ዐይብኪ ቤቱ ሐብሪኒ ሰምሐኒ እግል ኢበሉ። እንዲ ኢትደሌ ፍርድ ህዩብ ወመትህያፍ አክረቱ እላ ቲ።” ቤለየ እብ ህግያሁ ትዑስ እት እንቲ።



መስኦልየት ትትሐመል። እብሊ መጃል እሊ ትትደሐት እት ህሌክ እግልሚ ትምሕል ትዋሕል ዐልከ! አዳም እት ፈራቅ እት እንቲ እግልሚ አክል እሊ ትትኣከር?”

“መዐሊሽ አነ ዲብ ዕደደት ብዕደት ጸንሐኩ፤ ዱዩግ ዐልኩ። አዜ ላኪን ማጽእ ህሌኩ። ክለ ልትትቀደረኒ እግል እውዴቲ። እንተ ደዐ ውዴ እግልኒ እንሻለ ረቢ ሰዴኑ። ኢትሕረቅ፤ ምን ሐሩቀት ወመሻቀለት ለትትረከብ ይህሌት።”

“ኢትሕረቅ ትብለኒ፤ ወልከ ምን ለሐምም ወሐኪም እንዲ ተኣከረ ምኡ ምን መደት ሚ ወወዴክ? ማይ ሕፋን ለኢትከዐ እቲ ብሩድ ለአመሰሉ። እሊ ክእነ ሕሙም ህለ ወልከ ምን ገብእ፡ እት

ተህራብጥ ክሉም ሐካይም

ሐቆ መደት ለሐኪም ምን ቅርፊት ሻፍግ እት እንቲ ፈግረ። ለእናስ እንዲ ቀርበዩ “ዶክተር፡ ዶክተር፡ እንሻለ ተዐወትከ? ለዐመልየት ነጅሐት ማሚ? ወልዩ እብ አርወሐቲ ህለ ማሚ?” ሰኣላት ደርብ ሰኣላት ፊተተ እቲ። ለሐኪም ሰኡ ሻፍግ እት እንቲ። “ቴለል ወልከ እግል መመርዳት ትሰኣል እብ። አነ አዜ ፋዲ እትከ ይህሌኩ።” እንዲ አቤለዩ ክባባይ ገብእ።

ለእናስ አንያቡ እት ለሐራጥጥ “በዲር አምረ ዐልኩ። ወልዩ እብ ሰብብ ተኣከር እሊ ሐኪም ሞተ! አሕ!” እት ምድር እንዲ ጀግሐ እብ ብካይ ጨጭ ቤሉ። ህቲ እትለ አካነቲ እት እንቲ፤ ምን ቅርፊት ሙመርደት እንዲ ፈግረት። “ ይቤ አሰናይኩ ዐመልየት ወልከ ነጅሐት። ተማም ህሌ ምነ በንጅ ክምሰል ፊገ (ክምሰል ሐሶስ)

ተርብየት እብ በሰር

ዎሮት እናስ ወልዱ አደቡ ሰኒ እኩይ ሰበት ዐለ። ዲብ እናስ ላብብ እንዲ ነስኣዩ። “እሊ ወልዩ ገበይ ሐብሩ ወምን አደብ እኩይ እት ገበል ክምሰል ለአቀብል ውደዩ እግልዩ” ቤለዩ። ለእናስ ለላብብ እግለ ሕጻን እት ደብዐት ናይ ዕጩይ ጌሰ እብ። እግል መደት እንዲ ሐሰብ። “ሰምዐኒ ወልዩ፡ ምን እሊ ሰዐር ሰርዱት ንተሕ።” ቤለዩ። ለጅነ ምነ ሰርዱት እንዲ ናቅለ እግለ እናስ አርኣዩ። አዜመ ለእናስ እግለ ጅነ ሰርፍራፍ እንዲ ገንሐ ናቅሉ እት ልብል አሰኣለዩ። ለሰርፍራፍ ሸባህ ምንመ አበ እግሉ ናቀልዩ። ሳልሳይ ዶል ዕጩተት ንኢሽ ንቀል እት ልብል ሐበረዩ። ለጅነ እብ ክለ ሐሊቲ ለዕጩት ለንኢሽ እግል ልንቀል ጀረበ። ሕንጉል እንዲ ልብለ ዐለ። ሐቆ ከም ተዐብ ነቅለዩ። ለእናስ እብለ እንዲ ኢደዌ፡ ዕጩት ዐባይ እንዲ ገንሐ። “አዜ ገድም እሊ ዕጩት ነቀልከ ምን ገብእ ፈዳብ እንተ። አብሸርከ ጀርባ።” ቤለዩ። ለጅና እብ ክልኡ እዲሁ ግንዳይ ናይለ



ዕጩት እንዲ ጸብጠ ነድነደዩ። ለዕጩት ሰኒ ዐባይ ሰበት ዐለት። እግል ትትነቀል ኢኮን ከሰከሰመ ኢትቤ። ለጅነ ህዩ እንዲ ተዐበ እት ምድር ወድቀ።

ለእናስ እት ልትሰሐቅ፡ “ሰምዐኒ ወልዩ፡ ሐላት እድንዩ ክእናተ፡ አደብ እኩይ ሰኒ እንዲ ኢሰብቅ እትከ ኢወርኬካሁ ምን ገብእ፡ ሐቆ ሰብቀ ዲብከ ክምሰል

እሊ ዕጩት ለአቤ እግልኩ። ለዕጩት ለነኣይሽ አጊድ ትነቀለ፤ ለዕጩት ለዐባይ ህዩ አቤት እግልኩ። አቅሩደ ሰዱድ ሰበት ቱ እግል ትትነቀል ኢትቀድር። እንታመ እሊ አደብከ እት ዶሉ ኢሳሬካሁ ምን ገብእ፡ ሐሬ እት ገበይ እግል ተኣቀብል ኢትቀድር። ” እት ልብል መክረዩ። ለጅነ ህዩ እብ ምክር ናይለ እናስ ለላብብ እት ገበይ አቅበለ ንብለኩም።

አጥዐሚቶ

አድም - ሰምዐኒ ፋይድ፡

ፋይድ - አሃ፡

አድም - ጭገርዬ እግል እትቀረጭ ሐዜ ሰበት ህሌኩ፡ ከም ተኣደፍዐኒ?

ፋይድ - 40 ነቅፈ

አድም - ሰምዐኒ ብርዕ ሰበት አነ ከኣፎ አክለ ብዕዳም ተኣደፍዐኒ። ሰር ወምን ሰር ወተሐት እግል ተኣድፈዐኒ ህለ እግልኩ።

ፋይድ - ለምሽክለት ብርሕ ሰበት እንተ ጭገርከ እት ሐዜ ዝያደት ወቅት ሰበት ነስኢ፡ ምነ ሰብ ጭገር ወለዐል እግል ትድፈዕ ወጅብ። አነ ላኪን ክምሰልሆም አደፍዐከ ህሌኩ።

መዐሊማት

• ዲብ ጅግረ ኩረት ዐለም አሰክ ሰነት 1970 ለዐለ ካስ ገዩል (ጁል) ልትበህል። ብራዚል ህዩ እግል ሐላለ ነስኣቲ። እሊ አዜ ለህለ ካስ ህዩ ናይ ፊፈ ካስ ልትበህል። ዲብ ትልህየ ኩረት እግር ለትወቀለት ሕሽመት ትትህየቡ።

• ዲብ ዐለም ለበዝሐ ማይ ጸብጠት ለህሌት መራት ባይካል ትትበህል ወዲብ ሩሰየ ትትረከብ።

• እግል ሰልፍ ዶል ሙሳፍሪን ጥያራት ለአትመቃርሐት ድውለት እንግሊዝ ትገብእ እት ህሌት እት ሰነት 1919 አንበተት።

• ዲብ አፍራቀ እት ሰነት ዕጩይ ለሰርት 5.3 መልዩን ሄክታር ገብእ። እሊ ምነ ዲብ አፍራቀ ለልትረከብ ዕጩይ 0.8 ምን ምእት ገብእ።

• ዲብ ሰነት 1995 ለትወፈ እሙር ኤረትርያይ መን ቱ ገብእ ትብሎ? አቤ፡ እሊ አቡነ ምሔርባይ ወልደአብ ወልዴማርያም ቲ። ህቲ እት ሰነት 1905 እንዲ ትወለደ እት ሰነት 1995 ትወፈ።

• ቤርሙደ ለትትበህል ጀዚረት ዲብ ቅብለታይ እንክር ናይ ምሒጥ አትላንቲክ ለትትረከብ እት ገብእ። እት ዋነተ ለህለ ክፋል ምሒጥ ደለ እብ ረኣሱ ሐልፈት ጥያረት ወእቡ ለተዐዳት መርከብ ምክራዩ ለለአቀዌ፡ አሰክ እሊ ምስጢሩ ለኢተአመረ ማያይ ክፋል ቲ።

• ጎልደን ገይት ለልትበህል ለለሀንጦጥል ወለለአትዐጅብ ክብሪ ህለ። እሊ ክብሪ እሊ እት መዲነት ሳንፍራንሲስኮ - ካሊፎርንያ ልትረከብ። እብ ሸክሉ ወገበይ ብንዩቲ ህዩ ሰኒ ለአትዐጅብ።

• እዲነ እግል ሰልፍ ዶል እብ ጀልበት ለዶረየ ፈርዲናንድ ማጂላን ቲ። ህቲ ወድ ፖርቱጋል እት ገብእ። እት ወቅት ለህይ ላኪን ዲብ ሐንቲ መንዴረት ሰጻንዩ እንዲ ገብእ እግል ዐለም ዶረየ ወቲለለ ደለ።



መግሀፍ

ዲብ ሐቲ ዐድ ዎሮት ጀጊን ለልትብህል እናስ ግሁፍ ነብር ዐለ። ዲመ ልትአንገድ ወእግል ማል ጸሩ ጀግሐ። ዲብ ሐቲ አካን አዳም ጅሙዕ ሐቆ ረአ ነብረ በልዎ ህለው እንዴ ቤሉ። እት ልሰዴ ክማም ገብእ ዲቦም። በልዎ ጸንሐው ምንገብእ ልትባገል ምስሎም። ዲብ ሸቁል ብዕድ ሐቆ ህለው ህዩ ገይስ ምኖም።

ጀጊን ዐዱ ሓግል ይዐለ። አቡሁ ግረህ ወንዋይ ዐለ እግሉ። ክምስል ሞተ ለማል እግል እሊ መንገብይ እናስ ተርፋ። ጀጊን እብ መግሀፍ ነብረ ትክፍዩ ይዐለት። ዲብ ዎሮት ውካን ርብዒት ምን እክል ወዐሙር ምልእት ምን ሐሊብ ነስእ ዐለ። ጸነ ሰገ ለብዲበ አካን ቃብል ልትመዩ ምን ኢነብረ። ዲብ ድጌ ህዳይ አው አውድ ሐቆ ለሀሌ ጀጊን ሰልፍ ክሉ ለሐድር። በዐል አክይ ዐገል ሰበት ዐለ እንዴ ኢክጅል ምስል ሕሹማም ወሰብ ገጽ ልትባገል። እንዴ ተአሰፊው አዝመው ምኑ ምንገብእ ለነብረ አምበል ተረት ደረብብ ወድዮ ምኖም።


ሰብል ድጌ ክሉ እብ ጀጊን ለሀድግ። አጀኒት ነኣይሸ ወሸባባት ዲብ መካይድ ጀጊን ልትሰሐቅ። ህቲ ላኪን እምበል ሀም ነብረ ብዕድ ሴመ ይዐለ እግሉ። ምሴ ወፈጅር እንዴ ልትአንገድ ወአካን ነብረ እንዴ ለአትቃምት ንዋዩ መውዕላይ እንዴ ኢረክበ ዲብ ከደን በደ። ገርሀቲ-መ ሰበት ኢልሐርስ መዓል ንዋይ ገብአት።ጀጊን እሊ ክሉ ኢክሰሱ። ለኢተዐበ ዲብ ነብረ ሰበት ረክብ ሕሰር ንዋዩ ወገርሀቲ ኢወደ።

መደት ሐቲ ሸባባት ናይለ ዐድ እብ መዋዲት ጀጊን ሰኒ ሐርቀው። እሊ ሚ እናሱቲ። እግልሚ ልትአንገድ። አፎ ማል ኖሱ ኢልአውዕል። እንዴ ቤለው እግል ለአፍሁሙ ጀረበው። አጭበበው ዲብ ወአትፋርሀው።ጀጊን ኢትከብተዮም። እንዴ ልሰሐቅ ዲቦም። “ስምዑኒ አነ ዛር ብዩ። ደየፍኩኒ ምንዲ ገብእ አንገዶት አዝም ምን” ቤለዮም ለሸባባት ዲብ አካን ትልህዩ ሰበት ዐለው። ሰኒ እንደይፈክ እንዴ በሌው “የለ አውኪራት ጀጊን ግሁፍ ክበር ዝበጠ እግሉ” ቤለው። ጀጊን ብላይ እንዴ ከረ ዲብ ከተይ እብ ሰሰዒት ወደ። መንደሊታት እብ ሕበር እት ለአጠቅዖ ወክበር እት ዘብጦ አንበተው። ዲብ ዓዳት ዛር ለቡ ነፈር ኖሱ ለትረይሐ ሕላየት እንዴ አፍገረ ለአነብተ። ለመደይፈት ህዩ


እንዴ ትከብተው ምኑ ለሐልወ እግሉ። አሰክ ዛሩ ፈግር ህዩ ሰሰዕ።

ጀጊን እምበል ሰሰዒት ሕላየት አፍጋር አበ። ማን ወድገለብ ተህላብኦ። ለሸባባት ጀጊን “ሕላየት በል ለትርይሐክ ሰሚ እግልነ” ክምስል ቤለው እንዴ ኢነቅም ሰሰዒቲ አተላለ። ለሸባባት እለ ወዱ ትቀዌት ዲቦም። ህቶም እንዴ ለሐሉ ወጀጊን እንዴ ሰሰዕ። ዎሮት ምን ውላድለ ረብዐት “የሀው አዜ ንደረር ለሰገ ብሹል ህለ”ቤለ። (ረብዐት መሐበር አው ጅምዕዮት ናይ ሸባባት ተ። ናይ ኖስ ቀዋኒን ወእሱል ህለ እግሉ። ውላድ ረብዐት ማል እንዴ አትፋገረው። ለትፈናተ ነበሪት ወዱ።) ጀጊን ለሰገ ክምስል ሰምዐ እንዴ ትሸነቀ ዲብ ምድር ወድቀ። ለሸባባት ሰኒ ደንገጸው። የው እናስ ትሸነቀ የለ ዝበጦ እግሉ። አዜ ሕላየት እግል ለአፍግር ቲ። እንዴ ቤለው ክበርታት ጃም አበለው እግሉ። ህቲ እንዴ ሰሰዕ ሕላየት አንበተ። ለሕላየቲ ክእነ ትብል።

አነ ዛርዬ ዛር ነብራቲ ዛር ሐሊብ ወሰጋቲ አነ ዛርዬ ዛር ነብራቲ በሃርም ወለ ቃባቲ አነ ዛርዬ ዛር ነብራቲ መጠቅ ለእበ ለምዶቲ እሊ ሰገ ሰራሰር ገድክ ትገብእ ባካቲ ሐኩም ሸቅል ኢፈቲ። እምበል እለ አርወሐቲ ለሸባብ መረ ትፈክረው። እሊ ልተልሂ ዲብኝ ሀለ። አዜ



ህዩ ለኢደፍዐ ዲብ ሰገ እግል ልብለዕ ለሐዜ ህለ እንዴ ቤለው። እት ሰሰዕ እብ ሞረ ጠነብብ ወደው። “ግረ እለ ኖስክ እንዴ ሸቁክ ኢትደረርክ ሰሚትክ እንክሬ” እንዴ ቤለው



ምነ ሐረት ትዳገነው። ጀጊን ድንጉጽ ዲብ እንቲ ክባባይ ገብኦ ምኖም። ምናተ እግል ኢልሸቁ ህኩት ዲብ ዐጭሙ ሰብቀት። እግል ኢልትገሴ ህዩ ከብድ ነብረ ሐዜት። እለ ወዱ ትቀዌት ዲብ። አዳም ክሉ ሰበት አመረዩ ደለ እግል ልትአንገዱ መጸአዩ ገጽ ጸሊም እቡ ትከብተዩ።

ጀጊን መንበረት ክምስል መረት ዲብ ድጌ ብዕድ እግል ልትአንገድ ሰተተ። ለድጌ ምነ ዐዱ ገበይ ክልኡ አምዕል ገብእ። በዐል ገበይ እንዴ ትመሰለ ዲብ ድጌ ገንግኦ። ምነ ድጌ እት ዎሮት ዐድ ክምስል መጽኦ። እብ ሕሽመት እንዴ ትከብተው። ቡን አጅመደው እግሉ ወሐርደው እግሉ። ሰኒ ትረይሐ። ዐድ በኪት ረከብኮ ቤለ። ዲብ እሊ ድጌ እንዴ ልትናከሱ። አምዒላት ክምስል ወደ ለአዳም መአንግዳይ ክምስልቲ እግል ልትሸከኩ አንበተ። ክምስል ኢዮም ሰልፋ ሕሽመት ኢረክበ።

ዲቦም። ምስሎም እንዴ ልት ጌለል ዲብ ቤት መልክ ናይለ ድጌ በጽሐው። ለዐስከር ዲብ አፍለ ቤት እንዴ አብ ጠረዮም “አህ መንባኝ ለጅማዐት አምጽኦክዎም” ቤለዩ።

ለመልክ እት ለሐማሕም “አነ ዐስር ነፈር ቶም እቤለክ ማሚ። ህቶም ላኪን ዐስር አሮ ጋብኦም ህለው። እሊ ነፈር እሊ ምን አዩ ትወሰከ?” እት ልብል ትሰኣለ። “ሓይሰ መንባኝ እሊ ነፈር አነ እሉም ጀማዐት እንዴ እጌልል ኖሱ ተሐበረ ዲቦም” በልሰ ለዐስከሪ። ለመልክ ሰሓቅ ተርጀገት እንዴ ልትሰሐቅ። “የሀ ቅላደት። ዎ ቅላደት። ነዐ ሸፈግ እብለክ ህሌኮ” ክምስል ቤለ ቅላደት ሰይፍ እንዴ ጽብጠ ምነ ዘሪበት ብርግልሸ ወደ። እለ ዶል እሊ። ለአንፋር እብ ፈርሀት አርዐደው። ጀጊን-መ ክሉ ለቲለል ትቀው ዲብ። “የሀው። እለ አካን ዐዙመት ተ ማሚ? ምድር ከአፎ ዲብ ትከሬኮ? አነ ሓልፋይ ገበይ


ለተዐንበልብል ህሌክ። እሉም አንፋር ቃኑን ናይ ሰበት ረፍደው። እግል ልትቀተሉ። አነ ዐስከሪ ነድኦኮ ዲቦም። እንተ ህዩ ከለዋክ እንዴ አመርክ ዲቦም ተሓበርክ። ረቢ ልባርከክ። ሕነ አምራምክ ይዐልክ። አዜ ኖስክ ርሕክ ሐቆ ፈረድክ እግል ትትቀተል ቲ። የለ ቅላደት ክሉም ቃትሉም። አስግደቶም ባትክ። አዜ እብሊ ለኖሱ ትሓበረ ዲቦም አንብት” እት ልብል አሰኣለ።

ቅላደት ብዋረቲ አክል ሐርማዝ ትገብእ። ዕንታቲ ዕንታት ዕንግሌ። ፈናዲሁ ንጋረት። ዕስሩ ቀይሕ ክምስል ሕክዴታይ። ድርጅ እግል ግፈት። ክለ ለግንሐቲ አቤክ ልርአዩ። እግል ሰይፍ ዲብ ወትውት። እንዴ ለአክክዕ።

“አነ ዎሮት ይእሰርዕ ቀጻፍ እወዴ ደረምዕ ዓጻት ምን ቀጣኒተ እሸልዕ ሰጋድ እንዴ ነተፍኮ ሞት አከርዕ እንተ ጀጊን። ገድም ግረ እለ ኢትነብር ሰኒን ሰጋድክ እግል እንተፍቲ እወድዩ ሕኒን።”

እት ልብል ሐራብጠ ወአዳፈረ። ለብዕዳም ዐስር ነፈር። ምን ቅላደት እንዴ ፈርሀው ዕንታቶም አቅመጨው ወሸሃደቶም ጸብጠው። ጀጊን እብ እንክሩ ሰኣየት ባትክ ዲብ እንቲ። “ቅላደት ሐሰብክ። ዐይብክ። አነ ሰጋጂ ኢትቅረጭ። ሐሰብክ ለእቤለክ ውዴ እግልዬ” እት ልብል ተሐሰበ። ቅላደት እግል ገሀረት ለመስል ዕስሩ እንዴ ገይጽ። “ምን አስወ እቅረጨክ? እንተ ገድም ሞት ኢተርፈክ” እት ልብል ሸንኩቲ ቀርቦ። ጀጊን እንዴ ለሀቀብቅብ “ገድም ሐቆ ትምሕከኒ ኢገኣክ ምን እለ ከብጃ ቅረጨኒ። ሰበቡ ህዩ ከብጃ ተ ለዲብ እሊ ክሉ ነሳይብ ካሬተኒ” በልሰ።

ዒማት። ክታብ እፈ



ብድረ ዐጃላት እት ካስ ደዋር ተ' መት

ጅግራታት ዐጃላት ካስ ደዋር አቅሊም ምግብ 2025፡ ለሐላፊት ሰንበት ዐባይ 13 አፕሪል እብ ናይ ክለት ብድራሁ እት ባካት ሽርከት ተእማናት ተመ።

ሓምሳይት መርሐለት እት ለትጃግረየ አዋልድ፡ 71.7 ኪሎምትር ገልበበድ፡ ኩለ ለጅግረ እት ዋሌ ለአቲት መትባድራይት ፈሪቅ አራግ ብርክቲ ፍሰሃይ፡ እብ ወቅት ምን ገብእ ወጅግረ ሰጋይድ ክም ትትዐወት እንዴ አከደት ቱ ለአቲት። ለታርፈተ ዐለት ናይ ንቅጠት ጅግረ ሌጣ ተ። ምን ፈሪቅ ደንደን ሮምና ጉዕሽ እብ ሐምስ ንቅጠት ደርብ ሰበት ዐለት።

ሮምና፡ ዲብ እት ምግብ ለዐለየ ክልኤ ናይ ንቅጠት ሽላት ምግባያት፡ ደርብ ሕድ አወላይት ወክልኤት ሰበት አቲት፡ ሐምስ ንቅጠት ክሰበት። ብርክቲ ላኪን ኢወስከት። እብሊ ህይ፡ ለክእሉል ንቅጠት 36 ንቅጠት አክል-ሕድ ገብኤ፡ እትላ ናይ ደንጎበ ጅግረ ህይ ምን ክልኤተን ሰልፋይት ለአቲት ምንን ተ እግል ትትዐወት ለዐለ እለ።

እት አልባብ መትፈርጅት ለረይሐ ናይ ደንጎበ ጅግረ ሽላት ህይ፡ ዮም ዓመት ምን ጋላ-ነፍሐ ዲብ አራግ ለትዐዴት ብርክቲ፡ እግል መትባድራይት ሰራይር ሳዋ ሲዶን ሀብቶም እብ ንኢሽ እንዴ በድረት፡ 11 ንቅጠት አክእለለት። አድያም ዳዊት እግል ወለት ፈሪቅ ሮምና እንዴ ተሌት ሳልሳይት ገኣት። ሰማን ወሰቦ ንቅጠት ህይ ነሰኦየ።

እብሊ ህይ ብርክቲ፡ እብ 47 ንቅጠት ለሐሰት መትባድራይት ሽላት ናይ እሊ ጅግረ ገኣት። ሮምና እብ 43፡ ወአድያም 38 ንቅጠት እንዴ ረክበየ መነሰት ዐርገዩ። እምበል እሊመ ብርክቲ፡ እብ 17 ንቅጠት ሀርመ ሰጋደት ነሰኦት። ሰዛና ፍሰሃይ -ምን ፈሪቅ አቅሊም

ግብለት ክምሰልሁመ አድያም ደርብ ሕድ እብ 12 ወ11 ንቅጠት ክልኤት ወሳልሳይት።

እብ ክእሉል ወቅት ብርክቲ፡ እብ 13 ሳዕት፡10ደቂቀት ወ31 ክልኤት ዕውትት ናይ እሊ ጅግረ ገኣት። ሰዛና 35 ክልኤት፡ ሞናሊዛ አርአያ -ምን አራግ ደቂቀት ወ41 ክልኤት እንዴ ደንጎረየ ደርብ መነሰት ዐርገዩ። እብሊ ህይ ብርክቲ፡ ለሰለስ ዐውቲ ወቅት፡ ሰጋደት ወሽላት እንዴ ሐየበት አወላይት ተዐወተት። እምበል እሊመ፡ ምስል ለልትጃግረ እብ ዕምር ላኪን ክልኤይ



ዕዉት ፈሪቅ ዐጃላት አዋልድ አራግ

ዲቪዘዩን (ጃንዩር) እንዴ ትብህለየ ለትዓረየ መትባድራት ምን፡ እብ ወቅት ሲዶን ሀብቶም ተዐወተት። ደርብ ሮዚና ብርሃኔ -ምን ፈሪቅ አራግ ተሌተ። ሲዶን ናይ እሊ ጅግረ ሀርመ ሰጋደትመ ነሰኦት። እትሊ፡ ሮዚና ወናርዶስመ ደርብ አተየ።

መትባድራይት ፈሪቅ ግብለት -ናርዶስ ጸጋይ፡ እብ 22 ንቅጠት አወላይትላ ጅግረ ገብኣት። ሲዶን ወአርሴመ ዐንደጸን -ምን አራግ እብ 12 ንቅጠት ደርብ ገኣየ።

እብ ፈሪቅ ምን እንረኤ ህይ፡ ፈሪቅ ዐጃላት አዋልድ አራግ እግል ሰልፍ ኢት ተዐወተ፡ ወደርቡ ፍረቅ ግብለት ወሰራይር ሳዋ።

እትላ ሓምሳይት መርሐለት ጅግረ ዐጃላት ውላድ ዐባይ፡ እት 100 ኪሎምትር ትጃግረው። እት ሳዕት 43.8 ኪሎትር እት ልትፈተቶ ህይ እብ 2ሳዕት፡ 16 ደቂቀት ወ52 ክልኤት አትመመው። መትባድራይ ናይላ እብ ሸበህ ሸበህ እት መጃገረት ለዐርግ ለሀለ ፈሪቅ ፈሪቅ ግብለት -ሮቤል ሀብቲማርያም ህይ፡ እብ ለትረይሕ ሽላት እግል ሄብሮን



ወለት ሳት ጅግረ ውላድ

ሳልሳይ አትመመ።

እምበልሁመ ኤሰሮም፡ እብ 20 ንቅጠት ሐየት ሰጋደት ነሰኦ። ደርብ-ሕድ 13 ወ12 ንቅጠት ለረክበው -ሮቤል ሚክኤል ምን ደንደን፡ ናይ ብሕቶት መትጃግራይ ሮቤል መሓሪ ህይ ደርቡ ለትዐወተው ገኣው። እብ ንቅጠት ምን ሰምበል መትባድራይ ሄብሮን ቱ እብ 27 ንቅጠት ለትዐወተ። ናኦድ ብርሃኔ - ደንደን 21፡ ወሮቤል መሓሪ እብ 15 ንቅጠት ደርቡ መነሰት እት ትትሸወው።

ምን ፍረቅ ህይ ደንደን፡ አሰር-ሕድ እግል ክልኤ ኢት እትሊ ካስ ደዋር እንዴ ተዐወተ ትሆገለዩ። ሰምበልመ ክልኤ ኢት ናሰኦ ቱ፡ አሰቤት ሐቲ ዶል፡ እት ትመጽእ ሰነት ፈሪቅ ደንደን እግል ሳልስ ዶሉ ተዐወተ ምን ገብኤ፡ ለካስ እግል ዲመ ናይ ሐላሉ ገብኤ።

እት ነፍሰ ለምዕል ክልኤ ወሳልሳይ ዲቪዘዩንመ ራብዓይት ናይ ደንጎበ መርሐለት ተልሀው። 70 ኪሎምትር መሳፊት ለትዳሌት እሎም 2ይ ድቪዘዩን ሽባን (ጃንዩር)፡ ምን ፈሪቅ ናትና -ኤፍሬም ተክሌማርያም ተዐወተ ዲበ። ሚክኤል ዳንኤል - ደንደን ወኤርምያስ ዐቅባይ - ትጽቢት ህይ፡ ደርቡ ተለው።

እትሊ ጅግረ እሊ እብ ወቅል እሰይ መሰ ምን ፈሪቅ ሰምበል ተዐወተ። ኤሉድ ክፍሎም - ኤራቴል፡ ኪሸን ተክሌማርያም - አሰቤት ክልኤ ወሳልሳይ ፈግረው። እሰይ፡ እት ሰጋደትመ ህቲ ተዐወተ። መትባድራት ደንደን - ሚክኤል ዳንኤል ወናታን ተሰፋ-አለም አሰሩ አተው።

ኪሸን ህይ፡ ለናይ ንቅጠት እት ተዐወተ እብ 20 ንቅጠት። ሚክኤል ወናታን ህይ፡ አሰሩ መነሰት ዐርገው። እብ ፈሪቅ ህይ ፈሪቅ ሰምበል እግል ሰልፍ ኢት ዕዉት ካስ ደዋር ጋብኦ ሀለ።

እምበል እሊመ፡ ናታን ሳምኤል -ናይ ደንደን፡ እት 50 ኪሎምትር ለገልበበ ናይ ሳልሳይ ዲቪዘዩን ጅግረ ነኦይሽ ሰልፋይ እንዴ ገኣ ተዐወተ። አሚነደኦብ ወልዴዮሃስን - ምን ፈሪቅ ትጽቢት፡ ዮቤል ተሰፋ - ምን ፈሪቅ አሰር ተለው።

አሚነደኦብ ዲብ ጅግረ ሰጋደት እት ልትዐወት፡ እብ ንቅጠት - ንፍታሌም ቅዱስ ምን ፈሪቅ ኤ.ቢ.ኤን፡ ክምሰልሁመ ዳንዮም ሰለሙን ምን ትጽቢት ደርቡ ተለው። እት ናይ ሰጋደት ህይ፡ ምን ፈሪቅ ገጆረት ሲራክ በረኽት፡ ክምሰልሁመ ዳንዮም አሰሩ ጸብጠው። ፈሪቅ ትጽቢት ህይ ምን ፍረቅ ለትዐወተ ዐለ።

ደንደን፡ አስክ ዐውቲ ታምም ልሽእግ

እት ክልኤይ ሾትመ፡ ክልኤት እብ ሰምኦን አስመላሽ፡ ወአርኤር ጎል እብ መድሃኔ ረድኢ ወቤንሀር አማንኤል እንዴ ወሰከው። 5-1 ቀልበው። ጎዳይፍ ለኦሮት ዮቲም ጎሎም እብ ተመስገን ተሰፋይ ቱ ለረክበው። ለሐሰ መተልሀይላ ጅግረ ቤንሀር አማንኤል ትሰመ።

እት ምሴት ለሀ ለትወቀለ ሕሰር

ህየብ ለዐለ ትልህየ ፍንጌ ደንደን ወአዱሊስ ለገብኣት ተ። ለሐሰት መጃገረት ለትረኤት ዲብ እሊ ትልህየ፡ ቀደም ዕርፍ እምበል ጎል ትፈናተው ዲበ።

አስክለ ምኦት ምኦታይት ዐውቲሁ ልሄርሊ ለሀለ ፈሪቅ ደንደን፡ መደርቦም ሳምሶን ሀብቲማርያም “ደርቡት ጀዘ ትወጅበን” እንዴ ቤለ ምስል ዳይነ

ሰበት ትከሐድ፡ እብ ከርት ቀዩሕ ምን ሚዳን ትጠረዘ። መተልሀይላ ደንደን ሴም ተኪኤ እብ ረኣሱ ለኣተቶ ጎል ላኪን እግል ደንደን ለዐተቀ መድሕናይላ ፈሪቅ እት እንቲ ትረከበ።

እት 75 ደቂቀት፡ መዳፊዕ ደንደን ዮሴፍ ጸጋይ እብ ክልኤት ከርት ሀርዲ ምን ሚዳን ሰበት ትጠረዘ፡ ደንደን እብ

ክም ኣይል-ማይል 1-0 እንዴ ተዐወተ፡ ሄራሩ አስክለ ዐውቲ እድሙን ሀለ። ሴም ህይ ለሐሰ መተልሀይላ ናይላ ጅግረ ነሰኦ።

እትሊ ጅግረ ሻምፕዮን ሱፐር ዲቪዘዩን ኮበሪት እግር አቅሊም ምግብ፡ ደንደን እብ 39 ንቅጠት እት መሬሕ፡ ደርቢ በሐር ቀየሕ እብ 30 ወአተሕሪር እብ 23 ንቅጠት ተልዉ ሀለው።

ፕሪመርሊግ ዲብ 32፡ ሳምንቱ

ለዐባዩ ፍረቅ እንግሊዝ -ፕሪመር ሊግ እትላ ሳምንመ ትልሀይታቱ ዋዲ ዐለ። ቃልብ ወቅሉብ ለገብኣ ፍረቅ ዶል እንረኤ፡ ለፍገራቱ ክእነ ተሌ ትመስል።

ማንሲቲ እግል ክሪስታል ፓላስ 5-2፡ አሰቶን ሺለ እግል ሳውዛምፕተን 3-0፡ ኤቨርተን እግል ኖቲንግሃም ፎሬስት 1-0፡ ምልሸስ እግል ቶቶንሃም 4-2፡ ሊቨርፑል እግል ዌስትሃም 2-1፡ ኒውካሰል እግል ማንዩናይትድ 4-1

ወርሄማውስ እግል ፋልሃም 1-0 ቀልበዎም።

ለጥደለ ፍረቅ ህይ፡ ብራይተን ምስል ሌሴስተር 2-2፡ አርሰናል ምስል ብራንትፎርድ 1-1 ወፔልሲ ምስል ኢፕሰዊቸ ታውን 2-2 ትፈናተው።

ሰቡረት ፕሪመርሊግ እት እብ 76 ንቅጠት አወላይ ፈሪቅ ሊቨርፑል፡ ክልኤ እብ 63 ንቅጠት ፈሪቅ አርሰናል ወሳልሳይ ኖቲንግሃም እብ 57 ንቅጠት።



እህትማም ድወል ለልሰሕብ ስተራተጂካዊት መጠቀት ኣርክቲክ

እትሊ እሌላት ኣሚሪካ እግል ጀዚረት ግሪላንድ እግል ትምለክ ተርእዮ ለህሌት ምራድ ወእንዲ ተለ እግል ቅብለታይ ቁጥብ እዲን ኣቅሊም ኣርክቲክ ለክሰስ ቤለ ቤለው እብ ርሒቡ ልትነሸር ክም ህለ ልትኣመር። ግሪላንድ ዲብ ኣርክቲክ ለቀርብት ተ እብ ስትራተጂካዊ መካሪት እግል ክልኡቱ ኣሃምየት ሰበት ቤ እብ ሰብብ ትሩድ ቅርሲሰ ህዩ ለኢትብርበረ ዕቁር ርዝቅ መዓድን ሰበት ልትረከብ እተ ዲብ እሊ ወክድ እሊ ለትጠወረየ ድወል ብዙሕ እህትማም እግል ልውደየ ዲብ እስብዱያት ህለየ።

እብ በረድ ለልትገልበበ ምሒዋ ኣርክቲክ ምን ርሒብ ኣርድ 6ይ ኣፍ ገልብብ። ምን ዲብ ቀበት ኣርድ ለልትረከብ ዕቁር ርዝቅ ጃዝ ወጋዝ ህዩ ለ 22 ምእታይት ዲብ እሊ ኣቅሊም እሊ ልትረከብ። ኣሰክ እሊ ምሒዋ እሊ ለልትሓደድ እብ ማይ ለትገልበበ ብለቅ ምድር ለመልክ ክም ኖርወይ ወሩሰየ ለመሰለ ድወል ህዩ ምን መዓድን ገርዘ ዐቢ ክም መልክ ልትኣመር።

በረድ ኣርክቲክ እብ ሰብብ ሐፋነት እዲን እት መክክ ገይሰ እቱ ለህለ ወክድ እግል ሐረከት በዋቢር ወተዕዲን ለዐናቅፍ ለጸንሐ በረድ ልትወርኬ ሰበት ህለ ምሰለ ኣቅሊም ለኢልትገወረ ድወል እንዲ ኢተርፈ መርከዝ እግል ልጽብጠ እቱ ምራድ ለርእየ ክምህለየ ልትኣመር። በረድ ኣርክቲክ ዲብ እሊን ለመጽእ 15 ሰናታት ክሉ ረእሱ ክም መክክ ሰብ መቅደረት እበ ለሃየቡ ለህለው ወግም ህዩ እብ ሻፍግ ዲብ በካት እግል ልትሰመዐ ለቀድረ ብዝሓት ድወል መትሐሳረን ለዐቤ ህለ።


ዲብ ሰነት 1996 ለትኣሰሰ ምሰለ ኣቅሊም ለልትጋወረ 8 ድወል እግል ኣርክቲክ እበ ክሰስ ለልትጋመየ እቱ ‘መጅልስ ኣርክቲክ’ ለልትመሀል ህለ። ለክም መትፈርጃት እግል ልሻርክ ለትሰመሐ እግልን 11 ደውለት ህዩ ዲብ ሕቁቅ ናይ ዶሉ ምልክየት ናይለ ሰማን ድወል እዲህን ክም ኢልኣትየ መሳልሕ ለረክበ እበ መናሰበት ሌጠ ልታክየ።

ኣሚሪካ፡ ሩሰዩ፡ ከናደ፡ ዲንማርክ፡ ኖርወይ፡ ኣይስላንድ፡ ቪወደን ወፊላንድ፡ ኣዕዳእ ናይለ መጅልስ ገብእ እት ህለየ፡ ኣሚሪካ ወሩሰየ ህዩ መዳፈዐት ህጃም ኒክሎር ለክምክም ዐቢ ናይ ዐስከርየት መዐሳክር ዲብ በካት ክም በዮ ልትኣመር። እብ ሰብብ ለ ፍንጌ ዮክረን ወሩሰየ ዲብ እሊ ለሐልፈ ሰናታት ለትወለዐ ሐርብ፡ ፍንጌለ ድወል ኣርክቲክ ለዐለ መቅረሕ ሰላም ሰበት ትዘርረገ ወለ ድወል መዋቅሩን ዲብ ክልኡ ክም ትክፈለ ወኣዜ ለህለ ናይ ኣርክቲክ ለገንሕ ኣፍካረን ናይ ሕሩብ ኣልባርደ ለመሰል ክምቱ ልትኣመር።

ከናደ እግለ ናይ ጆኦግራፍየት ዕድዋንዩ ለቤለቶም ጀሃት እግል ጋብሆት ምን ሰነት 2024 ወሐር ‘ኣርክቲክ ስትራተጂ’ ለልብል

በራምጅ እዱሌት ህሌት። ሩሰዩ ዲብ መንጠቀት ኣርክቲክ ወድዩ ለህሌት ነሻጣት ለልኣትሻቅል ክምቱ ለትሸርሕ ከናደ ዲብ በካት ለልትሐረክ በዋቢር ብዕዳት ድወል ተውሳክ ኣህዳፍ ታየኖት ለበን ክምተን ዲብ ተሐብር ጸንሐተ። እት መንጠቀት ኣክቲክ ለህለ ገርዘ ማይ ናይ ከናደ 4.4 ሚልዮን ኪሎ መትር መረባዕ ለገልብብ እትገብእ ለበዝሐ ለኢትፈተሽ ክምቱ ልትሃደግ።

ኣሚሪካ ዲብ ሰነት 1860ታት እግል ኣሳስክ ምን ሩሰየ ምን ትዛቤ ወሐር እብ ማይ ኣርክቲክ ለትገልበበ ርሒብ ግንራራብ ብለቅ በሐር ለትመልክ ምንማተ ዲብ እሊ በካት ኣርክቲክ ተውሳክ ሕዝኣት እግል ትጽበዋ ትጅህድ ህሌት። ዲብ እዲን ለዐቤት ጀዚረት ግሪላንድ እግል ትምለክ ለህለ ምራድ እብ ትሉሉይ እት ሸርሕ ዲብ እሊ እሌላት እሊ መሰከረቴር ርኢሰ ኣሚሪካ ኣሰክለ ጀዚረት ዝያረት ዋዲ ክም ዐለ ልትኣመር። ውቁላም ሰብ ሰልጠት ኣሚሪካ ደማነት ሰላም እዲን እግል ኣክዶት ጀዚረት ግሪላንድ ሐንቴ ኣሚሪክ እግል ትግበእ ክም ወጅብቱ ለሸርሐ። እግለ ናይ ኣሚሪክ ንዛም ረኣሰ ማልየት ለልጸገግ ብዕድ ንዛም ሕኩመት ለመልክ ድወል ዲብ ቅብለታይ ዋልተ እዲን ለገንሕ



በራምጅ ሐቅ በን ኣሚሪክ እግል ጀዚረት ግሪላንድ ክምመ ህሌተ እግል ትሕደጋቱ እንዲ ትቤ ቀየሞት ለኢልትቀደርተ።

እትሊ እሌላት ዲብ ግንራራብ ኣርክቲክ ለትትረከብ መዲነት እተ ገብእ እብ ሩሰየ ለዳለ ‘እድንያይ ዋዕለ’ ርኢሰ ሩሰየ ሻላድሚር ፑቲን፡ ኣሚሪክ እግል ግሪላንድ እግል ትጽበዋ ለትወድዩ ሩሰየ ክም ኢሻቅለ ወዐዳወት ክም ኢትወዴቡ ከሊመት እስመዕ ዐለ። ኣዜ ለህሌት ሐዳሰ እዳረት ኣሚሪክ ለኣምጽኣቱ ምራድ ክም ኢኮን ለሐበረ ፑቲን ኣሚሪክ ምን ሰነት 1860 እንዲ ኣሰብዴት እግል ግሪላንድ ወኣይስላንድ ጅዙእ ምን ኣራዲህ እግል ቲዴ ትጅህድ ክም ዐለት ምናተ ዲብ ወክድ ለሃይ ለዐለ መጅልስ እንዲ ትቃወመ ክም



ኣትረፈዩ ወደሐ። ርኢሰ ኣንድራው ጆንሰን እግል ኣሳስክ ምን ሩሰየ እብ ሐድ 7 ኣልፍ ዶላር ልትዛቤ እት ህለ ‘እግል ሳንዱቅ በረድ እክል እሊ ማል?’ እት ልብሎ ዲብ ጀራይድ ለኣፈግሮ ክም ዐለው ፑቲን ኣትፋቀደ። እንዲ ኣትለ ህዩ “ኣሚሪካይን እብ ሰበት ኣሳስክ ኣዜ ብዕድ ልብሎ ህለው” ቤላ።

ኣሚሪክ ግሪላንድ እግል ትንሳእ ዲብ በካት ሰነት 1910 መ ጀርብት ክም ዐለት ሐቅ ካልኣይ ሐርብ

ዲብ ግንራራብ ሚናት ወከደማት ለልሃይብ መኣሳሳት እግል ብንዩት ልትቀደር። ብሕሰ ዕሎም ከርሰ በሐር ወጀው እግል ኣትጋያሰ መራክዝ ቅብለታይ ገለብ ኣሰሶት መ ልትቀደር። ለገብእ ተፈውቅ ዐስከሪ ለልትሰመዐ ደውለት ኣው ሃም ቅወት እግል ልግበእ ለልሐዜ ተጀመሶ ቅወት። እተ መንጠቀት ኣርክቲክ መደረት እግል ኢለምጽእ ለትዳፍዕ ቅወት እግል ኣትፈረርት መ ለኣቀድር።

ሰእዮታት መንጠቀት ኣርክቲክ እግል ሰላም ወተጠውር ድወል

እት መንጠቀት ኣርክቲክ ለትትረከብ መዲነት ሩሰየ መርማንሰክ እድንያይ ዋዕለ ኣርክቲክ ትትከበት ኣሰመነት። መንጠቀት ኣርክቲክ እግል ናይ ሰላም መሳልሕ ድወል እዲን እግል ትወክል ለህለ እግለ ኣብካት ህዩ እብ መሰኡሊን ሩሰየ እብ ተፋሲል ትቀደመ።

ርቡዕ ምን ርሒብን ምልክየት ሩሰየ እት መንጠቀት ኣርክቲክ ገብእ እት ህለ ምን ናይ ክል ሰነት እተይ ቀበት ዐድ ሩሰየ ቀሊል ለኢልትብህል ምእታይት ምን እሊ ክም ልትረከብ ልትኣመር። ሩሰየ ዲብ እድንያይ ዋዕለ እግለ ሻረከየ ዲብ ኣርክቲክ መትሐሳር ለልኣርኡ ሰብ ሸርከት እብ ኣትናያት ምን ረይም ምብራቅ ወግብለት ኤሰየ ዲብ እሊ ቅብለታይ ክፋል እዲን ለገይሰ ኮሎንዩ በዋቢር ትጃረት እብ ኣርክቲክ እግል ልትዕዴ ለልኣቀድር ብንዩት ትሕትየት ልትከደም ክም ህለ ኣትኣመረት።

ዲብ መደት ሰውሺት ሕብረት ጠቢዒ ኣርዛቅ እግል ዐደኖት ወኣትጋዓዝ ነፈዕ ለዐለ ‘ቅብለታይ ገበይ በሐር’ ዲብ ልትብህል ለልትሰሚ መትሐሳሊ። ዲብ እሊ ወክድ እሊ ምን ምፍጋር ጸሓይ ኤሰየ ኣሰክ ኣርብ ለሐጭረት ገበይ ተ። ምን ጃፓን ኣሰክ ኣርብ እብ ከናል ሰዌጽ እንዲ ኣበለ ሐድ 21 ኣልፍ ኪሎ መትር ነሰእ ለዐለ ሪም፡ እብለ ናይ ቅብለታይ ገበይ በሐር ሐድ 12,800 ኪሎ መትር እበ ትነሰእ ገበይ እግል ልትዕዴ ቀድር። ምን ኣትሳንቲክ ኣሰክ ምሒዋ

ፓስፊክ ለልኣትዕዴ ‘ቅብለታይ ምውዳቅ ጸሓይ መትሐሳሊ’ ኣርብ ለልትባሃል ብዕድ መትሐሳሊ መ ህለ። እብ ጅምዓት ጀዛይር ከናደ እንዲ ወደ ለልትዕዴ ወከናደ ክም ወጠንያይ ገበይ ሌጠ ትትነፋዕ እብ እንዲ ኢገብእ እግል ክሉ ክፋት እግል ቲደዩ ክም ወጅብ ሐብሬ ህዩበ ህለ። እለ ገበይ በሐር እለ ምን ምግባይ ምፍጋር ጸሓይ ኣሰክ ኣርብ እብ ከናል ፓናመ 24 ኣልፍ ኪሎ መትር እግል ሳፍር ለዐለ በዋቢር እብ 13,600 ኪሎ መትር ለሐጭረ ገብእ እግለ።

መንጠቀት ኣርክቲክ እምበለ ዲብ ግንራራብ በሐር ለልትረከብ ሰማን ድወል ለህለ እግለን ሕዝእ ናይ እቅትሳድ ኣቃሊም ለተርፈ ማይ ምሒዋ ኣርክቲክ ክምመ ብዕድ ምሒዋት እዲን ሚልካይ ኣሰብኒ። እት ክፍለት እዲን ላተ ኣንታርክቲክ (ግብለታይ ቁጥቢ እዲን) ብዝሓት ድወል መዓሳክር ብሕሰ ዕሎም ባንያት ክም ህለየ ዲብ ልትኣመር እብ እድንያይ ቀዋሂን ለልትሰማሕ ኣግቡይ ምልክየት ክም በን ህዩ ልትኣመር።

መንጠቀት ኣርክቲክ እምበለ ክም ገበይ ተቃርብ መትዐደይ በዋቢር ትጃረት፡ መራክዝ ብሐሰ ዕሎም ቀበት በሐር ወፊዳእ እግል ትውዴ ዲብ ለልኣቀድር መካሪት ክምመ ሰበት ተኣከደ እብ ዕሎም ተከኖሎጂ ለልትጃገረ ድወል እህትማም ወድዩ ዲብ ክም ህለየ ልትኣመር። ምን ቅብለታይ ዋልተ ራይማት ለልትረከብ ድወል እግል ኮሎንዩ በዋቢር ለልኣልፍ በረድ እትከሰተ ለተልየ በዋቢር ዋውራት ክም ህለየ ወእሊ በዋቢር እሊ ሕፍረት ቀበት በሐር ወታየኖት እግል ሊዴ ለቀድርተ።

እት መንጠቀት ኣርክቲክ 2.5 ሚልዮን ሩሰይን ክም ነብሮ ለልትኣመር እትገብእ እብ ኣሳሰ ለዲብ መዲነት መርማንሰክ እት ልሰማዕ ለኣሰመነ ሰቅራታት ብዙሕ ሽዐብ እግል ልሰከነን ለቀድረ መዳይን እግል ልትኣሰሰ ወእብ ፊራር ዐማር ወሐረከት እቅትሳድ እግል ልትዕመረ ሰእየት ገብእ።